

續文獻通考

卷八四——八六

5266
70-23



門 5保4
5266
卷 70-23

續文獻通考卷之八十四

皇明進士雲間王圻纂輯



職官考 官制 官數 請告 官制

宋

理宗淳祐五年十二月杜範入相首論事其五欲惜名器
如文臣貼職武臣閣銜不當為徇私市恩之地
時許應龍奏進故事畧曰臣聞為官擇人則官雖簡而
常若有餘為人擇官則官雖繁而常若不足今日之官
其冗尤甚倅貳添差大藩方置今則或創於列郡議幕
優閑絕無職掌今則或增為兩員諸司之屬添辟無已

續文獻通考 卷之八十四

制領之官同正並置不釐務者或給以正官之俸創窠
闕者多徇其親故之私至若軍功尤為濫泛不歷行陣
以議事為名而推賞初無寸功乃倖冒得官而注闕乃
若左選入仕自有成式不應陞等者妄冀陞等法當待
劾者免求待劾試銓不中則增年而注授京削尚欠則
減員而改秩自陳勞績未經覈實而濫叨遷秩牽合弊
例巧於經營而苟獲循資僥倖之門既開奔競之風滋
熾求而不予恐拂人情執而不行必犯眾怨夫貪位慕
祿誰無倖得之心設法為通適啓無厭之請為政者斷
之以至公律之以定法則宛轉營求者自然息念况州
縣之吏勞於從事而廩給微薄無用之官反安坐而享

厚祿此又所當察者伏讀開寶詔書有曰吏員冗多而
求其治誠難也俸祿鮮薄而責以廉無能也與其員冗
而費重不若省官而益俸州縣以戶口為率差減其員
而舊俸之外悉與增給大哉王言今日所當取法也矧
今之楮幣折閱已甚以蠲計之不及原俸三分之一何
以養廉若閒曹冗局可併者併之添差創闕可省者省
之冒濫得官者澄汰之扳援妄求者杜絕之一遵公法
不徇私情則當得者免需以次奸巧者莫敢攘奪尚何
舊弊之難革哉邇者邊功皆俾從軍冒授功賞嚴行追
究欺偽轉官者繳而不行妄求陞等者抑而不予固足
以明示意向息絕僥倖矣尤願守之以堅行之以必為

續文獻通考卷之八十四 置七十一
官擇人而不爲人擇官則各稱其職事罔不舉冗濫之弊既除俸給之費可省惟陛下與大臣亟圖之 應龍
又上劄曰臣聞量能而授官此古者用人之要術也夫
人之才不能皆全或純於道德或善於才幹優於理民
者將略未必長精於心計者法律未必審校短量長惟
器是適則事無不舉後世用人不問德之宜否才之稱
否既使之治兵又使之理財方使之理財又使之典獄
禮樂之任付之若而人工技之司付之若而人以一人
之身而責之以百官之所爲備固有才稱其職得以究
其所長者至於遷擢或又移之他職矣所職之事苟非
其所習則不得不委之吏故吏得以容其奸然則爲

官擇人者其可無以處之乎昔司馬光屢言於祖宗之
朝欲博選在位之士使德行者掌教化政術者爲守長
勇畧者爲將帥明法者典法明禮者典禮此正量能授
官之意在今日所當講明者而或者又曰雖量其能當
久其任善於其職者增秩加賞而不徙其官苟數遷數
易則心懷去就事復苟且是固然爾然好進者常情之
所不免倘積歲不遷將有十年不調之嗟從事獨賢之
嘆怠惰之心必生廢事之弊猶故是則久任之說固未
易以遽行也爲今之策惟精於財計者必使之理財迨
其遷也復以精於財計者代之長於銓綜者必使之典
銓迨其遷也復以長於銓綜者代之至於典禮典兵莫

不皆然雖不久其任而前後相繼者莫非其才之所長則何事之不舉何職之不稱哉

遼

國俗事簡職專官制朴實太祖神冊六年詔正班爵至太宗兼制中國乃分南面北面北面治官帳部族屬國之政南面治漢人州縣稅賦軍馬之事因俗而治得其宜矣初太祖分迭剌夷離董為南北二大王謂之南北院宰相樞密宣徽林牙下至郎君護衛皆分南北其實所治皆北面之事北樞密視兵部南樞密視吏部南北二王視戶部夷離董視刑部宣徽視工部敵麻烈都視禮部以齒北府宰相總之惕隱治宗室林牙修文告于越

坐而議論以象三公朝廷之上事簡職專此遼之所以興也

遼本契丹國自唐太宗置都督刺史武后加以王封玄宗置經畧使始有唐官爵矣其後習聞河北藩鎮受唐官名于是太師太保司徒司空施于部族太祖因之太宗大同元年始置北院樞密使明年以高勳為南面樞密則樞密之設自太宗入汴始矣天祿四年建政省事于是南面官僚可得而書其始漢人樞密院兼尚書吏兵刑有丞音戶工有主事書省兼禮部別有戶部使司以營州之地加幽薊之半用是適足矣中葉彌文耶律楊六為太傅知有三師矣忽古質為太尉知有三公

矣韓古得爲常侍衛涇爲禮部尚書知有門下尚書省
矣庫部倉部虞部員外出使則知備郎官列宿之員室
旌監修則知國史有院程藝舍人則知起居有汴邢抱
朴承旨王言敷學士則知有翰林內制張幹政事舍人
則知有中書外制大理司農有卿國子少府有監九卿
列監見矣金吾千牛有大將十六列衛見矣太子上有
師保下有府率東宮備官也節度觀察防禦團練刺史
咸在方州同于唐制
五京之制上京爲皇都朝宮中京官皆有之餘四京隨宜
設官爲制不一大抵西京多邊防官南京中京多財賦
官而五京並置者寡

太祖四年七月以后兄蕭敵烈爲北府宰相后族爲相始
此神冊六年以皇弟蘇爲南府宰相自諸弟構亂南府
名族各罹其禍故宰相位久虛以鋤得部轄里得只里
古攝之府中數請擇任宗室上以舊制不可輒變請不
已乃告於宗廟而後授之宗室爲南府宰相始此
五月詔正班爵

太宗會同元年十月詔陞南北二院及乙室夷離董爲王
以主簿爲令令爲刺史刺史爲節度使二部梯里已爲
司徒達刺于爲副使麻都不爲縣令馬達刺于爲馬步
置宣徽閣門使控鶴客省御史大夫中丞侍御判官文
班牙署諸官院世燭馬群遙輦世燭南北府國舅帳郎

君爲敝史諸部宰相節度使帳爲司空二室韋圖林爲僕射鷹坊監治等局官長爲詳穩時石敬瑭新獻十六州故也是年詔群臣及高年凡授大臣爵秩皆賜錦袍金帶白馬金飾鞍勒著于令

世宗天祿八年奚和朔奴奏曰臣見太宗時奚六部二宰相二常袞誥命大常袞班在酋長左右副常袞總知酋長五房族屬二宰相匡輔酋長建明善事今宰相如故二常袞乞依舊制從之

聖宗統和二年三月劃離部請今後詳穩止從本部選授爲宜上曰諸部官惟在得人豈得定以所部爲限不允四年八月置先離圖覽官二員領于骨里女直迪烈等

諸部之隸官籍者

太平八年十二月詔兩國舅及南北王府乃國之貴族不得以賤庶任本部官

興宗重熙九年十二月詔諸犯法者不得爲官諸職官非婚祭不得沉酣廢事時北王府布儼帳郎君自言

先世與國聯姻許置敝史詔以本帳蕭胡奴爲之十

年二月北樞密院言北南二王府洎諸部節度侍衛祇候郎君皆出族帳旣免與戍邊其祇候事情亦得以部曲代行詔從其請二十年十一月命東宮留守司總

領戶部省事罷中丞記錄職官過犯令丞青總之二十二年十一月詔諸職官以禮受代及罪去者置籍歲申樞密院十二月詔回紇部副使以契丹人充

道宗清寧二年正月詔二女古部世預宰相節度使之選者免皮室軍 三年十一月禁職官部內假貸貿易 咸雍五年十一月詔四方館副使止以契丹人充 太康九年十一月定諸令史譯史遷叙等級 十年四月降國舅詳穩班位在敵穩之下 大安元年十一月詔外官因舉進秩民受其害後皆以資給遷轉 二年六月詔高墩以下縣令錄事兄弟及子悉許叙用

金

金自景祖始建官屬統諸部以專征伐巖然自爲一國其官長皆稱曰勃極烈故太祖以都勃極烈嗣位太宗以諸班勃極烈居守諸班尊大之稱也其次曰國論忽魯

勃極烈國論言貴忽魯言總帥也又有國論勃極烈或左右置所謂國相也其次諸勃極烈之上則有國論乙室忽魯移賚阿買阿舍之號爲升拜宗室功臣之序其部長曰孛董統數部者曰忽魯凡此至熙宗定官制皆廢其後惟鎮撫邊民之官曰禿里烏魯國之下有掃穩脫朶詳穩之下有摩忽習尼昆此則具于官志而不廢皆踵遼官名也漢官之制自平州人不樂爲猛安謀克之官始置長吏以下 天輔七年以左企弓行樞密院于廣寧尚踵遼南院之舊 天會四年建尚書省遂有三省之制至熙宗頒新官制及換官格除拜內外官始定勳封食邑入銜而後其制定然大率皆循遼宋之舊

海陵正隆元年罷中書門下_止置尚書省自省而下官司之別曰院曰臺曰府曰司曰寺曰監曰局曰署曰所各統其屬以修其職職有定位員有常數紀綱明庶務舉是以終金之世守而不變焉

太宗天會二年二月詔諭南京官僚大小之事必關白軍帥毋得專達朝廷又命宗望凡南京留守及諸闕員可選勤賢有人望者就位擬之具姓名官階以聞 六年五月以官稱及俸給因革詔中外 十一年八月詔曰此以軍旅未定命帥府自擇人授官今並從朝廷選注

十四年七月汰兵興濫爵

時熙宗已即位

熙宗天會三年八月初定公主郡主縣主及駙馬官品

八年十一月左丞宗賢右丞稟等言州郡長吏當並用本國人上曰四海之內皆朕臣子若分別待之豈能致一諺不云乎疑人勿使使人勿疑自今本國及諸色人量才通用 皇統五年以古官曰牧曰長各有總名今庶官不分類為名于文移未便遂定名焉 京府尹牧留守知州縣令詳穩郡牧為長官 同知簽院副使少尹通判丞曰佐貳官 判官推官掌書記主簿縣尉為幕職官 兵馬司及它司軍者曰軍職官 警巡市令錄事司候諸叅軍知律勘事勘判為釐務官 管倉庫務院者曰監當官 知事孔目以下行文書者為吏凡除拜尚書令左右丞相以下品不同者則帶守字左

右丞則帶行守字 凡臺官御史部官京尹少尹守令
簿丞尉錄事諸卿少至協律評事諫官國子監學官諸
監至丞即符寶郎東宮詹事率府僕正副令丞王府官
散官高于職事者帶行字職官高于散官一品者帶守
字二品者帶試字品同者皆否 猛安謀克翰林待制
修撰判推勘事官都事典事知事內承奉押班通事舍
人通進編修勾當頓舍部役廂官受給管勾巡河官直
省直院長副諸檢法知法司正教授司獄司候東宮諭
德贊善掌寶典儀以下王府文學記事參軍並帶文字
樞密宣徽勸農諸軍都指揮統軍轉運使招討提刑
節度群牧防禦客省引進四方館閣門太醫教坊鷹坊

尚書巡檢諸司局倉庫務使副皆帶文字及知某事
帶知判簽書字者則不帶行守試字以上所帶字品同
者則否自三師三公平章政事元帥以下至監軍東宮
三師三少點檢至振肅承旨學士王傅副統招及前所
不載者皆不帶行守試知文字

海陵天德二年十二月命外官去所屬百里外者不許參
謁百里內者往返不得過三日 三年閏四月詔朝官
稱疾不視事者尚書省令監察御史同太醫診視無實
者坐之 正隆元年正月罷中書門下省平章政事張
暉罷并罷平章政事三月如定職事官朝參等格仍罷
兵衛五月頒行正隆官制

世宗大定二年八月詔曰祖宗時有功勞未曾遷賞者五
品以上奏聞六品以下及無職事者尚書省量約陞除
四年勅隨朝六品以繁劇局分官有缺者省不得注
擬令具關及人以聞 六年制官至三品除授朝廷約
量勞績歲月特恩遷官 七年九月詔吏人但犯贓罪
雖會赦非特旨不叙 又制內外三品官遇擬注其歷
過成考以上月日不曾遷加或經革撥可于除目內備
書以聞六品以下官命尚書省擬定而後奏 八年三
月命以職官子補令史 十二年二月詔自今官長不
法其僚佐不能糾正又不上言者並坐又詔自今除名
人子孫有在仕者並取奏裁三月詔尚書省贓污之官

已經歷問遣使即日罷之 十六年勅宰臣選調注擬
之際須引外路求仕人至尚書省堂量才授職 十七
年二月詔朝官嫁娶給假三月不須回告 二十二年
四月行監臨院務官食直法 二十四年以舊資考太
滯各減一任臨時量人才辛苦資歷以次奏稟 二十
五年十月戒護衛年老出職臨民 命學士院諫官秘
書監司天臺著作局閣門通進拱衛直武器署等官凡
直宮中午前許退 二十八年三月命應赴部求仕人
老病昏昧者勒令致仕止給半俸更不遷官十月復戒
尚書除授勿拘資格 二十九年七月時章宗勅近侍
官授外任四品三品十一月制職官轉遞文字法 又

定制自正七品而上皆以兩任後陞

章宗明昌元年三月制內外官并諸局承應人遇祖父母
父母忌日給假一日十月有司言登聞鼓院并起居注
院勿有所隸從之 三年十二月定到任告致仕格
四年七月制三品以上官有故者若親賢勲舊尚書省
即與聞奏議加追贈十一月詔諸職官以贓污不職被
罪以廉能獲陞者令隨路京府州縣列其姓名揭之公
署以示勸懲 又以前制有職官已帶三品者不許告
遷有司因之不舉以致無由遷叙遂定制已帶三品散
官實歷五月從有司照勘格前進官一階格後爲始
再算 六年十月命隨朝五品之要職及外路三品官

皆具人闕進呈以聽制授 七年勅隨朝除授必欲至
三十月如有急闕則具闕及人奏稟尋復令不須待考
滿後當通算其所歷而已 承安二年正月勅職官犯
贓罪不得訴于同官二月勅職官犯贓每削一格殿一
年十一月初設講議所官十員共議錢穀 四年二月
諭有司自三月二日爲始每旬三品至五品官各一人
轉對六品亦以次對臺諫勿與有應奏事與轉對官相
見難面對者上章亦聽三月諭尚書省官員必須改除
者議之其日月淺者毋數改易 時參知政事僕撒揆
等請罷諸州提點刑獄從之 五年正月曲宴群臣定
五品以上文武官侍坐員爲定制十一月初定品官過

闕則下制 以六品從五品闕必勅命歷三任正七品
方陞六品 泰和元年正月初命文武官職俱至三品
者許贈其祖七月諭刑部官凡上書人言及宰相者不
得申省 二年二月初置內侍寄祿官三月初置官苑
司都同監各一員四月定遷三品官格十一月初命外
官三品以上到任進謝表 三年五月汰隨朝冗官六
月罷惠川高三州秀巖灤陽徽川咸寧恭安利民六縣
及北京官苑使諸群牧提舉居庸紫荆通會三關使西
北路鎮防十三千戶諸路醫學博士八月更定閭門祇
候出職格十一月定收補承應人格 四年四月定隨
路轉運使及府官每司報謝于太廟七月勅宣徽院官

天壽節凡致仕宰執悉召與宴十月初定百官休假

六年正月命左右司五日一轉奏事 八年十二月初

設三司使掌判蓋鐵度支勸農事

衛紹王大安元年定文資本職出身內有至一品職事官
應選一品散官者實歷五十月方許告遷二品三品職
事官應告本品循遷者亦歷五十月不得過本品外四
品以下職事官如遷三品者亦歷五十月止許告遷三
品一資六品以下職事官歷六十月告遷帶至三品更
不許告犯選格者皆不許如已至三品以上職事者六
十月亦聽凡遷三品官資及致仕并橫遷三品者則具
行止以聞四品則六十月告遷雜班則否

宣宗貞祐元年九月設京城鎮撫彈壓官置招賢所 三年二月尚書省以南遷後吏部秋冬置選南京春夏置選中都赴調者不便請併選于南京從之四月罷行六部令各路運司兼之又減戶部幹辦官四員及差委官有差九月戶部侍郎奧屯阿虎言國家多故職官往往不仕乞限以兩季違者勿復任用上嫌其太重違限者止奪三官降職三等仍永不陞注 三年九月以空名宣勅付宣撫司凡夏人入寇有能臨陣立功者並聽遷授 興定元年正月東平行省言調兵以來吏卒因勞進爵多至五品例獲封贈及民年七十例該覃恩若人往自陳公私俱擾請令東路爲制誥勅類付朝廷以求

印署使受命者量輸諸物而給之人力不勞兵食少濟從之是月議減庶官冗員二月詔定州縣官雖階至三品坐乏軍儲者聽行部決十月定職官不求仕及規避不赴任法 二年三月御史以北兵退請汰各處行樞密院元帥冗官尚書以爲非便而止四月詔河南路行總管府節鎮以上官充宣差捕盜使以防禦刺史以上長貳官及世襲猛安之才武者爲之副九月設隨處行六部官以京府節鎮長官充尚書次侍郎郎中員外郎防刺長官充侍郎次郎中員外郎主事勾當官聽所屬任使州府官並充勸農事防刺長官及京府節鎮同知以下充副使 三年正月勅尚書省自今六部稟議常

事但可再送不得趣召辯正餘應入法寺定斷而再送
猶未當者具以聞下吏治之宰相執政以下皆不得召
部寺官部寺官亦不得詣省犯者論違制二月詔陝西
行省從七品以下聽注擬有罪許決罰丁憂待闋隨宜
任使軍官徒以上罪及軍事怠惰者巡按御史治之四
月詔河北州縣官止令土著推其所愛者充六月詔付
遼東等處行省金銀符及空名宣勅聽便宜處置七月
置東西南三路行三司 四年五月立二品至三品立
功遷賞格 五年五月詔州府及軍官捕盜慢職四品
以下宣慰司決之三品以上奏裁十月尚書省奏行院
帥府幕職雖無部衆亦常贊畫戎功而推賞止進一階

聽主將保奏第功行賞從之 元光元年四月定監當

官選法

哀宗正大元年設司農司自卿而下迭出巡察吏治臧否
以陞黜之 三年八月詔設益政院于內廷置說書官
日二人備直顧問 天興二年四月設蔡州四隅機察
官

元

太祖起自朔土統有其衆部落野處非有城郭之制國俗
淳厚非有庶事之繁惟以萬戶統軍旅以斷事官治刑
政任用者不過一二親貴重臣耳及取中原太宗始立
十路宣課司選儒臣用之金人來歸者因其故官若行

省若元帥則以行省元帥授之世祖即位大新制作遂命劉秉忠許衡酌古今之宜定內外之官其總政務者曰中書省秉兵柄者曰樞密院司黜陟者曰御史臺其次在內者則有寺有監有衛有府在外者則有行省有行臺有宣慰司有廉訪司其牧民者則曰路曰府曰州曰縣官有常職位有常員其長則蒙古人爲之而漢人南人貳焉於是一代之制始備大德後僥倖之門開方正之途閉官冗於上吏肆於下言事者屢疏論列而朝廷訖莫正之勢固使之然也

按陶宗儀曰元朝故事正六品以下奉勅署牒以命之牒具中書官位最尊者令也署牒者自丞相以下而不敢以煩令惟皇太子立必帶中書令樞密使太子既受冊即中書上日獨署一牒明日省臣以其名聞天子即以宣拜超授五品官其人非素親近有譽望取信于群臣者不得也

元初輔相之臣與凡百執事惟上所命其各官皆因其事而命之方事征討重在軍旅之事故有萬戶千戶之目而治政刑則有斷事之官可謂簡要者矣既取中原定四方豪傑之來歸者或因其舊而命官若行省領省大元帥副元帥之屬是也或以上旨命之或諸王大臣總兵政者承制以命之若郡縣兵民賦稅之事外諸侯亦得自辟用蓋隨事創立未有定制世祖中統以來始採

取故老諸儒之言考求前代之典立朝廷而建官府輔
相者曰中書省本兵者曰樞密院主彈劾者曰御史臺
以次建置內外百司庶府各因其事而舉矣其在內者
廢置升降之不同因革政治之所係也若夫宗戚之重
莫重於宗正府今宗正所隸特重於奸盜詐僞之刑稼
穡之本莫重於司農今勸樹藝者歲受其成自宣政總
佛事而西城邊事之重係焉至於內廷東宮之官屬若
國史翰林集賢之治文章宣徽之治王食將作之治管
繕如此之類皆以重臣領之蓋國家盛大庶事浩繁其
職掌之事視古昔幾至倍蓰故其官府之陞至於重大
而其屬亦已煩多日益月增其勢然也其後頗以官冗

吏繁爲言數有詔裁減而卒未遑及亦有不得已者夫
外之郡縣其去朝廷遠者則鎮之以行中書省郡縣又
遠於省若有邊徼之事者則制宣慰司以達之監鐵之
類又別置官有軍旅之事分布於外者則置萬戶府有
大征討則置行樞密院無則廢舉刺之事則有行御史
臺領監察御史肅政廉訪司以治之此其大凡也

元初任人惟其材能卒獲豪傑之用及得中原損益古今
之制度而行之而用人之途不一親近莫若禁衛之臣
所謂怯薛者然而任使有親踈職事有難易歷時有久
近門第有貴賤材器有大小故其得官也或大而宰輔
或小而冗散不齊也國人之備宿衛者其屬則以內貴

不以外官爲達方天下未定軍旅方興介冑之士莫先
焉故攻取有功之士皆世有其軍而官之事在樞府不
統於吏部惟簿書期會金穀營造之事供給應對習於
刀筆者爲適用於當時故自宰相百執事皆由此起而
一時號稱人才者亦出於其間而政治係之矣擇吏之
初頗由於儒而所謂儒者姑貴其名而存之爾其自學
校爲教官顯達者益鮮獨國學初以貴近就學而用之
無常制其後歲有貢法而寢失初意矣其以文學見用
於朝者則時有尊異者不皆然也至元以來數欲以科
舉取進士議輒中止延祐初乃置進士科三年一取不
及百人耳世祖皇帝置國字以通語言其用人畧如儒

學之制而加達矣至於奉上官之任使奔走服役歲月
既久亦皆得官雖細大有殊要皆爲正途矣乃宗王之
有分地官府而保任之者與夫治酒漿飲食者執樂伎
者爲弓矢衣甲車廬者治曆數陰陽醫藥者出納財賦
者遠夷掌其部落者或身終其官或世守其業不得遷
他官而有恩幸遭遇驟至貴近者有之非有司所得制
而陳言獻策納粟捕盜與勳舊之後裔權要之引進者
皆有其人焉而不常也凡入官之途大槩如此

世祖時朝廷錄平宋功遷至宰相執政者二十餘人因議
更定官制太常少卿王磐奏疏曰歷代制度有官品有
爵號有職位官爵所以示榮寵職位所以委事權臣下

有功有勞隨其大小酬以官爵有才有能稱其所堪處以職位人君御下之術也臣以為有功者宜加遷散官或賜五品爵號如漢唐封侯之制可也不宜任以職位中統時朝議汰冗官權近私以按察司不便欲并省之王磐又上疏言各路州郡去京師遙遠貪官汚吏侵一害小民無所控告惟賴按察司為之申理若指為冗官一例罷去則小民冤死而無所訴矣若曰京師有御史臺糾察四方之事是大不然御史臺糾察朝廷百官京畿州縣尚有弗及况能周徧外路千百城之事乎若欲并入運司運司專以營利增課為職與管民官常分彼此豈暇顧細民之冤抑哉由是按察司得不罷 至元

二年并六部為四以麥木丁為吏禮部尚書馬亨為戶部尚書嚴忠範為兵刑部尚書別魯丁為工部尚書又詔以蒙古人克達魯花赤漢人克總管回回人克同知永為定制 七年趙天麟上策請汰冗官其略曰臣聞設紀張綱莫如清簡建官置吏切戒煩多夫爵者官之尊也階者官之次也品者官之序也職者官之掌也位者官之居也祿者官之給也吏者官之佐也雖則事非位立而不辦亦有事因位多而益生此聖王所以貴寡而不貴多欲靜而不欲躁也漢光廢四百縣而下民業定隋文廢五百郡而天下政行皆以官不用多而在乎得賢政不在煩而貴乎省事也今國家立制自王及國

王郡王國公以下爲爵自特進崇進至將軍大夫校尉
郎爲階自正一至從九爲品掌典當行爲職各職所居
爲位各位養廉之資爲祿各司贊佐行文之史爲吏其
制亦已詳矣然而京師不急之司院無用之局署及隨
朝臺省部院以下諸有司官吏可兼不兼可併不併亦
已有之矣畿外行省隨省諸有司宣撫廉訪等司路府
州縣倉庫局監等諸衙門及合衙門官吏亦有冗者武
臣萬戶所管不滿萬人千戶所管不滿千人之類亦有
之臣竊以冗官之大弊有三一曰選法之弊二曰政事
之弊三曰軍民之弊夫文武官吏員數旣多當考滿之
時近春秋之選資格之簿擾攘紛紜保薦之文交錯旁

午有司行文猶且未暇奚暇顧孰果有才孰果有德而
考校之哉旣不遑考校則取準於籍文薦書之所陳布
者矣如此而欲雜流之人不進貨賂之門不開豈可得
乎雜流行賄者得志則人皆可以仕矣以致員多缺少
無如之何經營者早得遷除養高者坐淹歲月此選法
之弊也夫文武官吏員數旣多有當決之事而不決有
當行之政而不行問其職則曰我非此職問其施爲則
曰僚屬非一豈我之所能獨主混齊竿而難辨受王命
而自安及朝廷聞之遂立稽違期限之罰不亦晚與此
政事之弊也夫文武官吏員數旣多國家用人路廣浮
濫亦升遂使臨蒞在下豈能敷政化哉政教不敷而刻

劍之苦役使之煩爲害良多此軍民之弊也三弊不絕而立法以防之立法者不能旁照員益增而弊益多矣法立而懼法之人姦欺之計愈生乎故須三弊盡絕而後法乃可立也伏望陛下凡京師不急之司院無用之局署及天下諸衙門可罷者罷之凡行省隨省諸有司宜慰廉訪等司路府州縣一切諸衙門及萬戶千戶所管不及數之類可併者併之凡省臺院部以下諸有司之官吏及天下諸衙門之官吏可減者減之然後以慎名器之法擇人而用之又以考幽明之法順理而致之則典選者易見其人易程其效而選法清矣臨政者事有所歸職有所主而政績成矣在下者省於煩役免

於苛刻而民業定矣夫民者天下之本也民業既定天下自太平矣十五年詔汰江南冗官江南原設淮東湖南隆興福建四省以隆興併入福建其宣慰司十一道除額設員數外餘並罷去仍削去各官舊帶相銜罷茶運司及營田司以其事隸本道宣慰司罷漕運司以其事隸行中書省各路總管府依驗戶數多少以上中下三等設官故宋官應入仕者付吏部銓用二十三年七月清冗職詔曰惟我和宗肇造區夏雖中書已嘗建立官制未暇舉行迨予圖大以宅中思欲繼志而述事采儒臣之公議法前代之彝章爰立省部院臺以正朝廷綱紀自疆土極照臨之遠而省臺有內外之

分日益月增官冗人濫嘗勅有司而澄汰意能舊制之
遵承比聞近侍之言謂益曩時之弊彼不勝重任有壅
上聞苟尚蹈匪曩時惟予咎其清冗職用復前規於戲
官不必備惟其人朕恪守已成之憲爾尚克勤于乃事
尚永肩圖報之心由是銓定省院臺部官屬中書省令
外左右丞相並一員平章二員左右丞並一員參政僉
省並二員樞密院除院使外知院一員副使僉院並二
員院判二員御史臺大夫一員中丞侍御史治書並二
員行臺同六部尚書侍郎郎中員外郎並二員其餘衙
門並委都省斟酌裁減仍詔諭中外

胡粹中曰元之官名最爲不正中書政本既有中書令
矣復立左右丞相則丞相特中書令之佐職耳既以令
爲虛設左右丞爲正宰相而復設平章政事則又以平
章爲宰相貳矣然平章政事非宰相而何名之不正莫
此爲甚至其末流丞相而遙授焉則冗濫極矣又况員
數之多乎

二十四年麥朮丁言制國用使司改尚書省頗有成效
今仍分兩省爲便從之各設官六員尚書有平章政事
二員左右丞二員參知政事二員中書宜設丞相二員
平章政事二員參知政事二員省隴右河西道提刑按
察司分置鞏昌者并入甘州設官五員以鞏昌改隸京
兆提刑按察司設官六員省太原提刑按察司分置西

京者入太原遂以復置尚書省詔天下除行省與中書
議行餘並聽尚書省從便以聞 三十年汰冗官凡省
內外官府共二百五十五所官六百六十九員

成宗元貞元年詔選官專令中書擬奏省臣言樞密院御
史臺例應舉奏官屬其餘諸司不宜奏請今皆請之非
便詔自今以後專令中書擬奏 時改皇太后所居舊
太子府爲隆福宮詹事院爲徽政院司議曰中議府正
曰宮正家令曰內宰典醫署曰掌醫典寶曰掌謁典儀
曰掌儀典膳曰掌膳仍增控鶴至三百人 大德元年
四月省臺議上風憲事宜省臺臣僚奏阿老瓦丁及崔
或陳臺憲事宜臣等議乞依舊御史臺不立選其用人

則于常調官選之惟監察御史及本臺首領官許自舉
用各道廉訪司必擇蒙古人爲使或缺則以色目世臣
子孫爲之其次參用色目漢人各省文案聽行臺委官
檢覈有宿衛近侍奉特旨令憲臺擢用者必須明奏然
後任之行臺御史秩滿而有效者或遷內臺或呈中書
省遷調廉訪司亦如之不稱者省臺擇人代之未歷有
司者授任牧民經省臺同選者聽臺自調中書或用臺
察之人亦宜與臺臣同議各官有事風憲官毋得輒入
體察制曰可

按陶宗儀云內監察御史署銜無御史臺三字以爲天
子耳目之官非御史大夫以下所可制也行臺則不然

六年定赴任程限凡赴任官在家束裝假限二千里
內三十日三千里內四十日遠不過五十日馬日行七
十里車日行四十里乘驛者日兩驛百里以上止一驛
舟行上水日八十里下水百二十里職當急赴者不拘
此例違限百日外依例作缺赴任叅官法上司百里之
內者公叅百里之外者申到任月日上司官不得非理
勾擾失誤公事 七年省臣言內外官員年至七十者
精力衰耗例應致仕三品以下於應授品級加散官一
品令致仕

世祖至元初立封贈之制惟一二勲舊之家以特恩見褒
雖畧有成法未悉行之又制考課雖以五專責辦管民
官爲無激勸之方徒示虛文竟無實效自今每歲終考
課管民官五事備具內外諸司官職任內各有成效者
爲中考第一考對官品加妻封號第二考令子弟承廕
叙任第三考封贈祖父母父母品格不及封贈者量遷
官職其有政績殊異者不次陞擢仰中書叅酌舊制出
給誥命

按陶宗儀云大德七年詔內外官年及七十並聽致仕
時郭守敬知太史院事以舊臣且熟朝廷所施爲獨不
許其請翰林太史司天官不致仕者自郭守敬始

二月奉使宣撫奏罷賊汚官吏凡七道罷官吏一萬八
千四百七十三人 十一年七月時武宗已即位省臺奏銓選

非法省臣言內降旨與官者八百八十餘人已除三百未除者猶五百請自今越奏者勿與上曰然又言外任官帶相銜非宜而臺臣亦言省院臺得自選官具有成憲今監察御史廉訪司官非本臺公選而從諸臣所請降內旨用之非祖宗成憲上曰若此者卿等皆當執而勿與時以教坊司達魯花赤沙的選授平章政事仍領玉宸樂院事未幾樂工有犯法者刑部逮之沙的以王宸與刑部秩皆三品官皆榮祿大夫留不遣中書以聞帝曰凡諸司視其資級授之散官不可越超其閑冗職名官高者宜遵舊制降之

武宗至大元年七月勅行省宣慰等官非宣召毋得赴闕以多來結托故禁之二年中書省臣言世祖時省院臺及諸司皆有定員邇者諸司通陞一級四品者三品三品者二品二品者一品一司甚至二三十員事不改舊而官日增請依大德十年已定員數冗濫者悉加減汰從之三年正月減省中書官吏自客省司而下三百八十一員又增減省院臺官員令中書省官吏如安童居中書時例存設其已汰者尚書省遷叙減樞密院官存知樞密院七員同知樞密院事二員樞密副使二員僉樞密院事二員同僉樞密院事一員增御史臺官二員御史大夫御史中丞侍御史治書侍御史各二員省通政院官六員存十二員二月尚書省臣言官階差

等已有定制近奉聖旨懿旨令旨要素官階者率多躡
等願依世祖皇帝舊制次第給之制可九月勅諸司濫
設者毋給月俸詔給同實奴等去歲中書省奏諸司官
員遵大德十年舊制同時汰之今聞冗員如故有不以
聞而徑之任者有真其器而擅令之任及之任者並捕
逮之朕不輕釋

時馬祖常建白數事一言中書省樞密院御史臺三府
掾史雖職掌文書亦日佐文臣決埋政務伏請聞奏設
立律學算學博士命隨朝二品三品正流衙門吏人欲
求轉補三府掾史者就其所業於律學算學博士之前
應試依科舉例監察御史監試吏禮部官知舉每一周

歲試舉一次則三府有得人之實下無躁進營求之私
試中之人不必限以出身之高下不中者發下本役考
滿不得過從七品仍預照會施行一言諸道宣慰司除
吐蕃南詔兩廣福建外如淮東淮西荆南山東四道並
為無用徒月費俸廩坐養官吏而已如依準前代制就
令一道重鎮路分總管達魯花赤帶受本道宣慰使等
職名鈐轄數路上不煩朝廷虛設職官人吏下不使數
路官府牽制煩複無益於事一言諸翼軍官自萬戶下
至百戶子弟承襲父兄之職者合參酌古今之宜設立
武舉並須習學兵法武藝如蒙古色目人只試以武藝
如願試兵法中者陞階漢人兼試兵法武藝中式者方

許承襲如布衣之士願試及中者於各翼或不叙或力
絕等歇空相應名關內擢用如此庶使武備不弛軍政
嚴保大定功之事爲體不輕必若今日難於更張則
四_也方宣力老將旣已病死承襲驕脆子弟但知酒色裘
馬爲華好一旦直欲冒矢石執干戈以犯敵不惟本
人自取肝腦塗地從軍將吏死復何辜卑職屢觀前古
之迹其禍患弊病未有不生於太平之世竊慮及此伏
乞施行

英宗至治二年九月勅百司凡授官遵世祖制惟樞密院
御史臺宣政院宣徽院得自奏聞餘悉由中書

泰定帝泰定元年三月監察御史宋本李嘉質傳起巖言

太尉司徒司空三公之職濫假僧人及會福殊祥二院
並辱名爵請罷之不報

文身_也元曆元年九月時帝爲懷王宣諭中外曰昔在世祖
以及列聖咸令_也中書省綱維百司總裁庶務凡錢穀銓
選刑罪興造罔不司之自今除樞密院御史臺其餘諸
司及左右近侍敢有隔越中書奏請政務者以違制論
監察御史其糾言之 至順二年十二月河北河南道
廉訪使僧家奴言自古諸職官父母在三百里外三年
聽一給定省假二十日無父母者五年聽一給拜墓假
十日以此推之父母在三百里至萬里宜計遠近定立
假限其應省覲匿而不省覲者坐以罪若詐冒假期與

詐奔喪者詞科臺臣以聞命議之

皇明

太祖初下建康立中書省 上以中書省右丞相總省事
李善長宋忠顏為叅議李夢祥郭景祥為左右司郎中
侯原善楊原杲陶安阮弘道為員外郎孔克仁陳養吾
王愷為都事王疇為照磨樂鳳為管勾夏煜韓子魯為
博士善長進叅政徐達為右丞邵榮俞通海為平章政
事 上即吳王位善長為右相國改左徐達為左相國
改右常遇春為平章張昺楊憲為叅政 上即大位善
長為左丞相達為右丞相遇春為平章軍國重事湯和
廖永忠李伯昇李思齊王溥為平章不治事汪廣洋自

叅政為右丞謫楊憲為右丞遷左丞誅汪廣洋再為右
丞相謫胡惟庸由叅政為左丞進右丞相遷左丞相廣
洋復為右丞相汰平章叅政等官 十三年惟庸族廣
洋賜死罷中書省散其職大部置四輔官告 太廟以
耆儒王本杜祐龔駿為春官杜敷趙民望吳源為夏官
勅之曰昔之耕莘者為宰杜稷永安築巖者在朝君
仁民康二臣繼出于殷商致君六百年之大業是賢者
雖處司出異其忠君濟民之道則一朕今 召爾等來
朝 命為四輔官兼 太子賓客位列公侯都督之次
必欲聽於天人均調四時以臻至治其敬慎之居三日
後 勅謂人主以一身統御天下不可無輔臣而輔臣

必擇乎正士堯舜以得賢而昌辛受以棄賢而亡卿等
受斯重任宜體朕懷心常履道佐理贊化以安生民且
卿等昨爲庶民今輔朕以掌民命出類拔萃顯揚先親
天人交慶於戲盛哉又十日 勅本等曰自胡惟庸不
法之後特 召天下賢才而有司又從泛舉尚書范敏
獨能薦卿等以輔朕朕視卿等皆高年篤厚故九月告
於 太廟議立四輔以王本杜祐龔敷爲春官杜敷趙
民望吳源爲夏官惟秋冬官缺以本等攝之邇年自春
徂秋天災疊見維秋之暮天氣尚暄嘗 諭本等沐浴
致齋精勤國務以均調四時本等奉命且誠逮立冬朔
風釀寒以成冬令嗚呼天其兆吉人乎感應之機如響

斯答古者三公四輔論道經邦理陰陽順四時其或有
乖戾則曰公輔失職蓋人事有不齊則天應之有如此
者卿等尚當竭忠誠以勤厥職庶幾感格天心 御集
中又有與本等同游唱和詩多不載 明年 命刑官
議獄送四輔及諫院給事中覆覈無碍奏行之有疑讞
四輔官封駁之尋 召左御史中丞安然爲四輔官龔
敷致仕復起爲國子監司業尋以星變 勅諭王本等
本尋坐法磔於市又明年罷不復設 置大宗正院改
爲宗人府置宗人令左右宗人正左右宗人以 秦晉
燕周齊五王爲之俱正一品後本府以駙馬都尉領之
置 皇太子左右率府都督同知康茂才張興祖兼

左右率府使顧時孫興祖同知 王府事食事吳禎耿
炳文兼左右副使 置諫議大夫以唐鐸爲之 置諫
院左右司諫以耆儒劉垿關賢駁左右正言以耆儒趙
肅何顯周爲之 置執法議理司以前元工部尚書濂
爲之乃李韓公之女弟壻也 置審刑司左右審刑正
六品左右詳議正七品凡大理寺平允法司囚犯皆得
詳駁之 置考功承勅司文三監每監設令一人正六
品丞二人從六品監察御史馬亮張迥等五十六人爲
之 命中書省兵部定給武官 誥勅之制其特授陞
除者大都督府同承 勅監官以 上旨附籍其初入
仕者具年籍父祖已身功蹟其已入仕及陞除者具所

歷功過年籍 八都督府咨于中書省送兵部覆奏貼
考功監叅攷 四奏附籍部擬散官移文翰林院撰文付
司文監校勸 矣付中書舍人書寫署名用印轉付承勅
考功二監并 巡本部以次署名用印齊赴省府臺官署
名仍付司文 三對同署名用印方付各部給授如襲職
降用者大都 督府勘驗具年籍祖父功蹟降用者具其
罪名奏 旨處分承 勅監官附籍具咨省送部覆奏
貼黃叅攷對同擬官撰文署名用印給授如前 置平
駁諸司 命翰林院編檢以下春坊司直以下贊讀考
駁諸司奏啓如平允則署其銜曰翰林院兼平駁諸事
某官某押 置磨勘司令以 太子伴讀高暉爲之

置內正司司正一員正七品司副一員從七品專糾內
 臣之失儀者尋改曰典禮司又改曰典禮紀察司陞正
 六品尋止稱紀察司以李彬言等為之 置繩頑司令
 丞各一員 置稽疑司正一員正六品左右丞各一員
 從六品屬官曰司筮無品 置 東宮通事司令一員
 從八品丞一員正九品榮鉉鄭肅為之 置 東宮文
 學趙晉為之 置城門都尉一員以死事指揮劉廣子
 景為之 置皇子衛居文官子姓舍人衛居武官子姓
 以指揮使李安子忠領之 置侍儀引進使正五品
 閣門使從五品以故誠意伯劉基子仲璟為之 置尚
 賓大使儒學出以舉提舉司校理侍禮郎奉天門待詔俱

革 改樞密院為大都督府又為中左右前後五軍都
 督府使知院從一品為左右都督陞正一品副使同知
 院正二品為都督同知從一品僉院從二品判官從三
 品今為僉事正二品 上初下太平自稱太平興國翼
 大元帥下建康立天興建康翼大元帥府廖永安為大
 元帥常遇春尋為行中書省馬步水軍都督大元帥尋
 設江南行樞密院湯和同僉院事徐達廖永安同知院
 事改院為大都督府朱文正為大都督品如知院李善
 長兼府司馬宋思顏兼參軍後以李文忠湯和為左都
 督馮國用鄧愈為右都督永樂以後五府職名如故而
 權悉歸兵部有副使在僉事之上尋革復置大都督參

議一員正三品戶部尚書樊思民爲之又置掌判官品
 同參議吏部尚書陳銘爲之 五斷事司下各設稽仁
 稽義稽禮稽智稽信今俱革而其職爲經歷都事 御
 史臺左右御史大夫從一品中丞正二品侍御史正三
 品殿中侍御史正五品 太祖爲吳王始設臺臣以湯
 和鄧愈爲左右大夫劉基章溢爲中丞文原吉爲治書
 安然爲中丞基實幹臺事復省治書殿中不置而汪廣
 洋自左大夫入中書陳寧代之安然爲右大夫中丞涂
 節告變而臺以中丞爲長官安然任之後改爲都察院
 都御史僅七品御史九品尋復陞正三品俄以左右都
 御史代大夫爲正二品副都代中丞爲正三品僉都代

侍御爲正四品與六部頡頏 翰林院初設學士正三
 品講讀學士正四品直學士正五品待制從五品應奉
 正七品尋設學士承旨正三品學士從三品承旨則詹
 同宋濂爲之學士則陶安朱升爲之直學士陳桎范常
 爲之待制秦裕伯王禕爲之應奉趙震殷哲爲之後罷
 承旨直學士待制應奉不設而降學士正五品講讀學
 士爲從五品 建文初改講讀學士爲文學博士方孝
 孺任之參預機務如內相復置檢閱一員從九品 設
 華蓋殿謹身殿文華殿武英殿文淵閣東閣大學士俱
 正五品 洪武末華蓋以劉仲質邵質文華以全思誠
 鮑恂余銓張長年武英以吳伯宗文淵以朱善宋訥東

閣以吳沉爲之而無所領惟從容備顧問而已其後罷不設 建文中革大學士止設學士而以謹身爲正心然亦竟無授官 永樂始以胡廣楊榮金幼孜爲文淵閣大學士領閣務 洪熙進楊士奇華蓋楊榮兼謹身黃淮金幼孜兼武英獨以光祿署丞權謹爲文華殿大學士無兼官亦不預閣務謹去後文華至今不設大學士得非以 皇太子講讀之所故耶 嘉靖末以華蓋殿爲中極殿謹身殿爲建極殿首以徐階袁煒充建極殿大學士而中極自 隆慶初始補李春芳 洪武初設弘文館學士不言品秩以劉基危素雖稼胡鉉王大中羅復仁爲之尋革至 章皇帝初復建弘文閣于思善門右以儲經史備顧問翰林學士楊溥掌閣印 帝手授之侍讀王璉五經博士陳繼吏科給事中王榮叅其事不久併閣務入文淵閣溥亦辦文淵閣事 左右春坊大學士與正學士同品建文中以任董倫 永樂立東宮李至剛爲左解縉胡廣楊士奇因之解縉爲右黃淮因之 洪熙中曾榮爲左王英爲右 景泰中商輅爲左彭時呂原倪謙因之劉儼爲右劉定之因之逾五十年而 弘治癸亥會典成以左春坊學士兼侍讀學士遷中允楊廷和 上疑問之內閣其實對乃已廷和竟遷不設贊善大夫正五品宋濂嘗爲之後止爲贊善從六品司直以下亦不常設 置將作卿正三品單

安仁爲之後并入其事于工部而名尚存後改爲營繕
正 置司農卿正三品楊思義爲之後入戶部 置京
畿都漕運使正四品專治京師軍儲單安仁薛祥爲之
置宣徽院使正三品阮崇禮爲之後爲光祿司卿徐
興祖爲之最後爲光祿寺從三品 置太史院正三品
劉基爲之改院爲監使爲令通判僉事各一員後爲司
天監定爲欽天監正五品有正副等官 置回回監正
副以下同欽天監後革 置醫藥提舉司改太醫院監正
三品少監正四品孫守貞爲之後改爲太醫院使正五
品院判正六品 置滁陽牧監從三品後爲太僕寺
置儀禮司正副後爲鴻臚寺卿 置信寶提舉司正四

品後爲尚寶司正五品 置營田使專董墾近畿田大
都督府副使康茂才爲之 至嘉靖中設三都御史清
屯尋革 置帳前總制親軍都指揮使馮國用國勝爲
都指揮使朱文忠康茂才爲左右副都指揮 置金吾
侍衛軍都護 又置都鎮撫司孫養浩爲鎮撫 又置
都尉府正三品蓋即今錦衣旗手衛也 又置兵馬司
都指揮使副都指揮等官後改文職降至六品而猶冒
故銜

初置江南行中書省以後平浙江湖廣江西河南山東
等處俱設行省其品秩一如內省惟不設丞相袁國公
歐晉祥者因僞漢故官而已後改行省爲布政使司布

政使視平章爲從二品左右叅政從三品叅議從四品
行樞密院爲都司都指揮使正二品同知從二品僉事
正三品初下太平興國翼大元帥李善長爲都事潘廷
堅爲教授汪廣洋爲令史下建康諸路廖永安徐達常
遇春湯和俞通海鄧愈邵榮耿炳文爲大元帥後改翼
爲衛置指揮使司同知僉事等官事實品祿如故置
詹事院詹事則右都督馮勝領之同知則平章胡廷瑞
廖永忠李伯昇領之副詹事則左右丞趙庸王溥領之
後併爲少詹事置諸王府左右相各一員正二品左
右傳各一員從二品以鄭九成王克復汪河文原吉朱
復爲相桂彥良熊鼎爲傳而別設長史官爲正五品若
相屬官者尋以耿炳文吳良謝成等爲武相傳位居文
臣上其後革相傳併入長史見任者皆降秩五品而武
相傳事亦入護衛十八年命進士觀政六科承
勅考功諸監者曰庶吉士取庶常吉士之義也以楊靖
沈潛等爲之二十八年改六科給事中曰元士以見
在人數正得八十一也復改曰士源以政源所自出也
建文君建文元年更定官制六部尚書陞正一品增左
右侍中正二品侍郎如故省戶部十四司爲民部度支
部金帛部倉庾部省刑部十四司爲詳憲部比議部職
門部都官部諸司俱去清吏二字都察院左右都御
史去左右二字後改御史府都御史爲御史大夫通

政司使改爲卿 通政叅議爲少卿丞增其屬左右補
闕拾遺各二員 大理寺卿止稱大理卿左右寺正爲
都評事副爲副都評事司務爲都典簿 太常光祿太
僕鴻臚尚寶俱止稱卿其少卿丞分左右祠祭署之稱
天壇者曰南郊泗洲者曰泗濱宿州者曰新豐增鍾山
祠祭署及司圃所 光祿少卿陞從四品 太僕增少
卿丞各一員及典廐典牧二署驪驢十五群遂生三群
分隸之 詹事府詹事曰詹事卿少詹事曰少卿增賓
客二員 設資德院資德一員資善二員其屬贊讀贊
書著作郎各二員掌籍典簿各一員 國子監增司業
爲二員省博士學正學錄增助教爲十七員翰林院增
承旨一員文學博士一員省講讀學士置文翰文史二
館文翰設侍書革中書舍人職歸之文史館修撰以下
如故 殿閣學士俱去大字謹身殿大學士爲正心殿
學士 六科省左右給事中 五城兵馬指揮曰兵馬
副兵馬 布政使陞爲正二品止一員去左右字 提
刑按察司爲肅政按察司 陞廣東鹽課司爲都轉運
鹽使司 革五府斷事及稽仁稽義等官 親王府增
賓輔二員正三品左右長史上增長史一員正四品增
伴讀伴講伴書各一員審理典膳奉祠良醫典寶各去
正字 郡王賓友二員正四品教授一員紀室二員直
史一員左右史各一員吏目一員典印典祠典禮三署

各一員典饌典樂二署各二員引禮舍人二員儀仗司吏目一員凡賓輔三件賓友教授進對侍坐稱名不稱臣至 永樂初俱改正從 洪武之舊 更定勲階尚書曰特進資政上卿侍中曰資政卿二品如之侍郎曰資政亞卿卿三品如之郎中曰資政中大夫員外郎曰資政大夫給事中曰嘉政中士 又遣戶部左侍郎夏原吉給事中徐思勉等二十四人充採訪使分巡天下問民疾苦旌廉斥貪得以便宜行事

南京百官守備叅贊機務爲要重守備以公侯伯兼領南京中軍都督府事協同守備以侯伯都督得領五府事 孝陵奉祀禮或守備或協同守備大抵戚晚勳舊

也參贊機務以南京兵部尚書治所在中府 成祖初

改北平爲北京往來巡守 仁宗時爲 皇太子監國

南京 宣宗爲 皇太孫撫軍從行 成祖出塞監國

於北 永樂二十二年秋 皇太子即位 命襄城伯

李隆鎮守南京駙馬都尉沐昕同鎮守 洪熙元年又

以內臣守備南京是年南京地三月九震特遣 太子

往南京以祭告 皇陵 孝陵爲名實有監國之 命

四月發北京六月還京師即 帝位 宣德五年改鎮

守爲守備 命 宋駙馬西寧侯琥守備南京 景泰

元年又以都督僉事趙倫協同守備琥後豐城侯賢寧

選伯禮平江侯豫魏國公承宗成國公儀魏國公備成

國公輔魏國公鵬舉撫寧侯麒鎮遠侯寰相繼守備不
必魏國公也 宣德十年 英宗即位 命少保南京
戶部尚書黃福參贊機務參贊機務自福始黃公後南
京兵部左侍郎徐琦參贊機務歷十年而陞尚書理部
事靖遠伯王驥兼南京兵部尚書稱總督機務代琦
成化十一年南京兵部尚書崔良 三年南京右都御
史王恕相繼參贊機務 嘉靖初王守仁以
京兵部尚書薛遠代恕參贊機務 嘉靖初王守仁以
新建伯兼南京兵部尚書參贊機務不得稱總督如靖
遠伯

南京參贊機務守備文武大臣掌 皇城京城畿甸留

守之事以時行視 陵廟凡大小教場總將士新江口
肄水軍神機營習火器以時督察之官軍騎數歲一報
地圖文冊二歲一報諸江關浦口歲再遣人行視之軍
器歲製貢舟均其差遣而嚴緝之武學課業旗役併鎗
程督而監視焉盜賊歲更官行緝屯田請專官巡視凡
便宜事會九卿五府議請上又有操江都御史一人巡
江御史二人專職江防

南京宗人府經歷司經歷一人

吏部尚書一人侍郎一人郎中四人主事四人司務一
人

戶部尚書一人侍郎一人郎中十三人員外郎十人主

事十七人司務一人照磨一人

禮部尚書一人侍郎一人郎中四人主事二人司務一

人

兵部尚書一人侍郎一人郎中四人員外郎二人主事

五人司務一人

刑部尚書一人侍郎一人郎中十三人員外郎五人主

事十四人司務一人照磨一人司獄二人

工部尚書一人侍郎一人郎中四人員外郎二人主事

八人司務一人

都察院右都御史一人右副都御史一人右僉都御史

一人監察御史三十二人經歷一人都事一人司務一

人照磨一人司獄二人

通政司右通政一人右叅議一人經歷一人

大理寺卿一人右寺丞一人左右寺正各一人左右評

事各三人司務一人

太常寺卿一人少卿一人典簿一人博士一人協律郎

二人贊禮郎七人司樂二人奉祀三人祀丞三人

光祿寺卿一人少卿一人典簿一人署正四人署丞四

人

太僕寺卿一人少卿二人寺丞二人主簿一人寺在滁

州

詹事府主簿一人

續文獻通考 卷之八十四

國子監祭酒一人司業一人監丞一人典簿一人博士三人助教六人學正五人學錄二人典籍一人掌饌一人

應天府府尹一人府丞一人治中一人通判二人推官一人

鴻臚寺卿一人主簿一人署正二人鳴贊二人序班九人

翰林院學士或侍講讀一人孔目一人

尚寶司卿一人

六科給事中六人管冊戶科給事中一人

太醫院院判一人吏目一人

欽天監監正一人主簿一人

行人司司副一人

五城兵馬司指揮五人副指揮八人吏目五人

設官事例

太祖吳元年選郡縣官三百三十四人賞綺布道里費及其父母妻子有差著為令曰以養汝廉奉公無漁民也

洪武元年 詔中書省自今除府州縣官 賜銀十兩布六疋徵天下賢才為守令厚 賜而遣之 三年

上幸後苑見巢鵲卵翼嘆曰誰無母子令群臣親老得歸養是年 賜朝臣袍帶 賜廉吏嵩縣劉典史布

帛擇文儒性行清潔者充學官 賜文武官朝服公服

又 賜冬衣 四年中書省上府州縣一千二百三十九凡官五千四百八十八人令官吏犯贓者勿赦 六年令京官三十月一考考陞一等外官三歲一考考陞一階 勅按察司舉察有司官 七年汰北方府州縣官三百八人增公侯伯都督丞相御史大夫等官祿有差 八年增尚書行省叅政公田祿各百石 十年制賜百官公田租充祿俸初給典吏俸有差是年併省州縣 十一年 命考績殿最分三等稱職無過為上 賜坐宴有過稱職中宴而不坐有過不職下不預宴 叙立於門宴者出然後退廣西布政使臧哲母憂去 賜米鈔令喪一官並有一賜 十二年著令給丁憂官

俸有差 十三年置判祿司頒臣戒錄 上既誅胡丞相 命儒士纂歷代侯王宗戚文武宦官悖逆不道者凡二百十二人為是錄云 詔復京官家 勅守令恤民 十四年 詔有司遣替閑釋放官赴京叙用定考覈殿最法禁有司差遣學官 十五年 賜六部尚書馬 十六年廣東布政司請慶賀班秩 上曰禮行於藩司班以秩叙 十七年吏部尚書俞燠上更定吏員資格申薦冒濫考課失實之禁燠上考績法著為令令方面勿侵郡縣之職 十九年選應天諸府富民子弟補吏凡千四百人 二十年選南方學官有學行者教北方 二十四年 賜有司方面官馬 諭兵部試尚

續文獻通考 卷之八十四

書茹瑞曰布按二司官方而重臣府州縣官民之師帥跨驢出入非所以示民或假馬部民因被浸潤不能舉職甚乖治體其官爲市馬司二十四府半之州縣又半之馬一率十戶食之歲一更定儒學訓導位雜職上二十五年頒醒會簡要錄上以中外文武百司職名沿革品秩崇卑勳階陞轉俸祿損益歷年屢更無以示成憲於後世命侍臣重定其制頒天下二十六年頒諸司職掌定學官考課法初命儒學訓導冠帶上名吏部附選貼黃頒世臣總錄二十八年頒祖訓條章勅禮部有言改祖法者以奸臣論無赦是年罷百官朝參賜食二十九年始定外官三年一朝

朝覲三十年頒爲政要錄三十一年定吏員出身

資格建文中更官制文皇盡復故惟存大理寺

仁宗即位之歲命吏兵二部尚書蹇義李慶書都布

按三司官姓名履歷於武英殿西序曰皇考嘗書中

外官姓名於武英殿南廊便覽觀也宣德五年五月

令追奪賊官誥勅七年大學士張瑛乞增南北兩

京七品以下官俸正統元年副都御史吳訥言洪武

間京官俸全支後因營造減省遂爲例近來小官多不

能贍如廣西道御史劉準由進士授官月支俸米一石

五斗不能養其母妻子女貸同道御史王裕等刑部王

事廖謨等俸米三十餘石去年病死竟負無還乞下廷

議增俸 國初皂隸力役當是時百官俸全支已乃折鈔鈔法不行小臣不能給遂有柴薪之名徵其銀月一兩 宣德中都御史顧佐以柴薪事被訐 上問楊士奇對曰京官月俸一石薪炭馬芻咸資皂隸遣半取直籍其用彼得歸耕人情爲便京官皆然臣亦然自是遂爲例 巡撫官者永樂間設於要害處洪熙宣德初年添設漸多用都御史侍郎通政卿丞景泰中悉用都御史 叅贊軍務者始於洪熙元年以武臣踈於文墨選方面官於各總兵處整理文書商確機密遂名叅贊叅謀軍務總督邊儲 景泰中大同叅政丹陽沈固宣府叅政崑山劉璉山東叅議會稽周願廣西副使劉紹如

劉清輩又以郎中給事中稱叅贊軍務也 景泰初御史張子初等言洪武永樂間方面郡守缺聽吏部推請內外官賢能而又久於其任者請授御史有缺從吏部於進士監生中選用 宣德中始有會官舉保之例行之旣久奔競成風所舉非人况御史若從大臣舉保得任大臣有過彼必鉗口卷舌而不言大臣有囑彼必俯首貼耳以聽命願停保舉之新例而復洪武永樂之舊制下禮部會議曰御史言是 制曰可御史陳綱亦以命旨三年冬吏部尚書王直何文淵言洪武永樂間銓百兩職吏部宣德正統以來始令大臣舉保景泰初御

又言吏部選授私舛請復行保舉臣等謹議上繼今方
面府正員缺吏部具奏移文各該保官大臣書所保姓
名材行歷官緣由奏下部銓制曰朕期方面郡守得
人共安養天民令大臣舉保吏部推選已乃彼此相蒙
官不得人民其柰何今後惟布政使按察使缺令三品
上官會保餘還吏部訪求未幾吏科都給事中林聰復
以爲言著爲令四年御史左鼎言國初建官有常近
年因事添設甚至一部有兩尚書而爲侍郎者倍於原
額爲都御史者率以數十計在外添設撫民管屯等官
如河南叅議二員今則添而爲四僉事三員今則增而
爲七若夫巡撫鎮守之官則尤有可言者方岳各司十
餘人不爲少矣每歲又差御史巡視立法可謂詳矣
擇方面以責成不選御史以督察乃復設官以巡撫鎮
守徃徃多出於方面御史則今之方面御史蓋亦他日
之巡撫鎮守也豈有爲方面御史則合衆人之長而不
足爲巡撫鎮守則任一人之智而有餘耶乞將內外官
凡非洪武之舊者叅酌裁罷庶民力可紓國用可省委
任專而事功可立七年春令吏員冠帶引入內府
會官考試成化中太監張敏死姪太常寺丞苗傾貲
獻上乞侍郎上曰苗本由承差若侍郎六部執政
不可可授南京三品左右急持官制請上竟得南京
通政使是時四方白丁錢虜商販技藝輩職之流以及

士夫子弟率夤緣近侍內臣進獻珍玩輒得賜太常少卿通政寺丞郎署中書司務序班不復由吏部謂之傳奉官至於閣老之子若孫甫髫鬣已授中書冠帶牙牌支俸給隸但不署事朝參大抵多出於梁方之門弘治間馬文升言京官額一千二百餘人今傳奉官八百餘人內實支薪俸者九十一人冗官莫甚於今日請因災汰罷正德間亦有附權倖得文階者嘉靖初盡革諸傳奉乞陞官八年又裁冗官二千員後南京六部正貳卿往往停推土木之役起匠人而官至九卿者諸富人貴游子猾吏竄名營建籍中得官者不啻千人

世官事例

太祖洪武二年令功臣子弟入學初製鐵券三年存恤先鋒府十元帥府戰沒將校家定五等勳爵定武臣世襲之制四年禮官崔亮定外官慶賀禮以武臣為班首五年申定武選法作鐵榜申戒公侯六年定教練軍士律是歲計武官一萬二千九百八十人九年擇功臣子耿獻等一百四人為散騎舍人十一年選武臣子弟入國子學讀書十四年令公侯武臣皆遣子弟入國子學受業二十一年頒武臣大誥又頒八條勅諭武臣又頒武臣訓戒錄又賜武臣保身勅二十二年禁武臣預民事二十三年賜

續文獻通考卷之八十四

公侯伯屯戍百戶 二十六年 頒稽制錄於諸功臣

二十九年大賚致仕武臣各陞一級銓於甘肅大同北平大寧遼東諸衛所凡千五百人 永樂元年冬定

軍功襲替例自洪武永樂宣德年軍職絕不論堂兄弟姪並襲 成化十七年以都御史何喬新言凡軍職絕

非立功人子孫不得襲 弘治十八年又稍許立功人親姪孫已襲者得沿襲 正德十四年兵部尚書王瓊

又請堂兄弟姪並得襲 十六年兵部尚書彭澤言瓊議非是復不許襲會兵部火群失職者流言得復襲

嘉靖十年兵部尚書王憲酌議立功人絕同時親弟姪得襲其姪孫以下及堂兄弟姪除親祖例前相沿人自

立有軍功者扣襲其無功姪孫以下至堂兄弟姪等及沿襲後別無立功者不許襲旁子孫革職者俱收總旗

天順成化及弘治初年錦衣指揮門達袁斌朱驥等提督緝捕每至十年或十一年方一類奏下兵部定

議陞者不過五七人多止十人賞或以布絹鈔錠無功者撻而斥之已而有孥獲妖言陞襲一輩之例於是人

競貪功肆行羅織 弘治十八年特 詔嚴禁 正德元年錦衣指揮趙鑑葉廣東廠太監王岳鄭旺一時更

代不及數月官校四奏陞賞 二年又復類奏已而奸倖相繼用事廠衛無賴之徒鱗集蟻附辦事之員日增

獲功之奏漸數始則三年一奏或二年一奏後至一年

一奏或一年兩奏遂有年終類奏之名徃徃以妖言為首張皇賊狀無非倚撫之詞連署姓名不辨獲功之數含糊奏請朦朧擬陞奏一人則陞一人奏百人則陞百人市井庸流立陞朝籍權門厮役驟至顯榮且其假種妖書陰為陷竄買同番手誣執平民加以酷法慘刑煨煉成獄凡經廠衛奏送法司莫敢平反 弘治元年

孝宗有孳獲妖言不陞止照 成化十四年例給賞之旨今一切撓寢矣大抵 正德年間軍功冒濫其弊有三奏帶越額也紀驗失實也選法變亂也以故寧夏陝西甘涼大同應州雲貴江西湖廣山東河南虜賊之役陞擢極濫 嘉靖改元 詔革罷凡三千一百九十

九人而在外者又倍之殆不止於廠衛也乃若流官不許世襲署職止加實授今則流官以流得襲署職以署遞陞甚至納粟虛銜遂以軍功累授已而諸所革者徃徃得復故官

官數

遼官數無考

金大定二十八年在仕官一萬九千七百員四季赴選者千餘歲數監差者三千 明昌四年奏周歲官死及事故者六百七十新入仕者五百一十見在官萬一千四百九十九內女直四千七百五員漢人六千七百九十四員至 泰和七年在仕官四萬七千餘四季部擬授

續文獻通考 卷之八十四
者千七百監官到部者七千二百九十餘則三倍世宗之時矣

元至元三年總計官府大小共二千七百三十三處
皇明內外官共二萬四千六百八十三人京師一千四百
十六人南京五百五十八人在外二萬二千七百九人
按洪武四年正月中書省臣上天下府州縣官數府州
縣凡一千二百三十九官五千四百八十八員以今觀
之數不啻浮四倍矣

請告事例

凡京官患病 嘉靖六年令京官告病者吏部查驗的實
照例放回若託故詐病扶同勘保及病痊不赴任者一
體罷職 隆慶五年奏准京官患病先呈本衙門掌印
官查勘的確取具同鄉同僚官結狀代奏方准題覆

萬曆元年奏准凡京官中途養病及先養病在籍未痊
者須所在與原籍撫按官覈實具奏方與准理 十年
題准京官告病三年限滿又稱患病者不拘在籍在途
行所在撫按官查勘如有詐托據實叅處 十一年題
准京官患病危篤不能久待者掌印官勘實即與代奏
不拘注門籍三月 十三年題准京官再奏養病者准
與題覆再告違限者雖起文在二年之內亦不准理徑
行叅究若請告至三止許告休不許轉假如有材難終
棄者致仕之後聽撫按科道從公薦舉起用 凡各邊

督撫兵備等官患病 隆慶三年奏准不許自奏聽巡按御史勘明轉奏如有托疾避難者該科及巡按御史叅奏處治 凡御史患病 嘉靖七年令各處御史有告病者該部查勘是實方准放回若係推避就令致仕

八年令御史養病三年以上者革職冠帶閑任 二十一年題准巡按并別差御史如果患病不支許地方官員具實奏聞不許徑自具奏 二十七年令巡按告病巡撫官代奏者不准着回道自行具奏聽勘 三十年題准御史在差患病有撫按官代奏者仍准回籍調理 萬曆六年令巡按御史養病撫按官代題者行都察院勘實咨部方准題覆 凡兵馬患病 隆慶五

年奏准五城兵馬患病照序班例不分正副指揮俱准養病痊日起文赴部 進士有疾 萬曆二年題准在京調理三月之後如果真病令各該辦事衙門掌印官親自驗實方與具題 京官陞外告病 隆慶二年議准患病在先推陞在後比外官已到任者不同准令回籍養病痊日給文赴部 五年題准今後京官陞外告病乞休者俱令致仕不許病痊起用 丁憂患病 嘉靖八年議准各官養病限內丁憂及起文在三年之內者與違限情似不同進士未經受職亦難與各官槩論許吏部催取聽選 十二年令以後進士養病但違限三年以上者一體查革 隆慶四年題准但到部在三

年之外者不論起文日期俱照違限革職其三年赴部而又稱中途患病者照有疾例致仕六年題准養病官員起文在三年之內到部在三年之外者該司查驗果有本處官司印信保結照例收選外官告病嘉靖四年令有假託患病致仕者不准方面官六十以上方准致仕外官有不奏棄官及奏不候命而去者該部科道及撫按官糾舉二十二年奏准外官在任患病務由撫按官題允查明方許回籍如不候擅回者革職爲民同僚官一併治罪萬曆三年令外官有疾照例致仕不許撫按官更爲議調以啓規避九年題准倉官巡檢考滿及在籍服闋呈告起送者撫按官查已老疾不堪即令致仕凡外官陞京職未任患病隆慶五年議准行彼處撫按勘實放回調理

官員致仕事例

孝宗弘治十一年題准兩京五品以下官乞致仕者本部查其曾經三六年考滿稱職擬陞相應職銜具奏令其致仕不稱者仍照原職致仕十五年奏准在外衙門七品以上官有三年或六年曾經到部考稱及任內曾有旌異例該陞擢自願致仕者本部擬陞職銜或加散官服色令其致仕如布政使無官可陞者另行奏請定奪嘉靖十年題准內外官願告致仕者京官部院考稱職外官撫按有旌異及無所規避者方許陞職如考

語含糊僅保無過雖歷三年六年考滿止以原官致仕

四十二年議准 王親布政使乞休查係三年之外

致仕者准以正二品初授散官六年之外致仕者准以

正二品陞授散官九年之外致仕者准以正二品加授

散官 四十四年議准各衙門乞休官員如果勞績又

著輿論僉孚者照進階陞職例如尋常守官謹愿無過

者照原職例或晚節不終有所規避者止令冠帶閒任

不准致仕 嘉靖十年奏准凡大小官員陞遷未到期

告致仕者只許以原職致仕 萬曆十一年題准在外

官員中途患病願告致仕者許令差人自奏先行准覆

後行撫按官查覈有許託者經官察究 十二年題准

京官陞外職告病者以原任京官致仕外官陞京職告

病者止以原任外官致仕陞授長史者以新銜致仕

十三年題准陞除未任及公差考滿官員在于原籍官

司告乞致仕者查驗文憑執照明白即與轉申上司達

之撫按應題請者照例題請應報缺者類本報缺毋以

官非統屬故有留難 凡兩京考察被劾聽降聽調官

奏要以原職致仕者聽外官朝覲來京考察不及調用

又官員告乞以原職致仕者取結類題

文獻通考

續文獻通考卷之八十四終

五十一

續文獻通考卷之八十五

皇明進士雲間王圻纂輯

職官考 三公 宰相

三公 三孤附

遼北面于越府有大于越無職掌班百僚之上非有大軍
功者不授遼國最尊之官猶南面之有三公也太祖以
遥輦氏于越受禪終遼之世以于越得重名者三人耶
律烏魯屋質仁先謂之三于越 南面置三師府太師
太傅太保少師少傅少保又有三公府太尉司徒司空
此皆南面朝官之長 公師府有掌印官一人

金三師太師太傅太保各一員皆正一品師範一人儀刑

續文獻通考卷之八十五

四海三公太尉司徒司空各一員皆正一品論道經邦
燮理陰陽

元三公太師太傅太保各一員正一品銀印以道燮陰陽
經理邦國特示尊崇 太祖十二年以國王置太師一
員 太宗即位建三公其拜罷歲月皆不可考 世祖
之世其職常缺而僅置太保一員至成宗武宗而後三
公並建無虛位矣又有所謂大司徒大司空太尉之屬
或置或不置其置者或開府或不開府而東宮嘗置三
師三少蓋亦不恒有也 馬祖常上言司徒司空皆古
三公之流人臣名爵無如此極比者聖上踐祚之初沙
汰冗濫尤慎此官僅歲屢一員雜人等如沈宗攝汪元

昌輩亦受司空司徒竊恐天下後世傳爲口實非便

仁宗延祐五年監察御史言比年名爵濫冒太尉司徒國
公接迹于朝昔奉詔裁罷中外莫不忻悅近聞禮部奉
旨鑄太尉司徒司空等印二十有九此輩無功於國載
在史冊貽笑將來請自今閱閱貴重勲業昭著存留一
二餘並革去制曰可

皇明

國初設三公府正一品府罷而李善長徐達以丞相兼太
師太傅常遇春以上公贈太保三孤無兼領者

太祖高皇帝下江左因勝國之舊爲五等爵以贈勲臣及
文武之死綬者其後有王公侯伯之典而罷子男至公

孤絕不以爲贈

太宗文皇帝罷公孤官

仁宗洪熙中復設太師太傅太保曰三公少師少傅少保曰三孤侍上左右備顧問咨幾務無定員無專授爲勲戚文武大臣兼官加官贈文官惟贈得三公嘉靖初楊廷和一品十二年加太傅辭不受時置公孤官以居英國公張輔尚書蹇義等於是加贈姚廣孝胡廣得少師馬京少傅墨麟得少保文臣之贈三孤自廣孝等始

宣宗宣德中寵夏原吉其卒也欲爵之而不果故特崇以太師而蹇義因之文臣之贈三公自原吉始嗣黔公沐斌之薨欲王之則無功欲母贈則不容已故特優以太師勲臣之贈三公自黔公斌始周太保尚文之卒岳都督懋之戰歿宜伯而靳之一崇以太傅一崇以少師武弁之贈公孤自尚文懋始少詹鄒濟贊善王汝王爲仁廟舊宮臣故即位而贈太子少保賓客文臣之得贈東宮大僚自濟汝王始王一寧侍郎也以閣臣而得太子太師三品之躡得三太自一寧始太子太師太子太傅太子太保從一品太子少師太子少傅太子少保正二品太子賓客正三品皆東宮大臣而不列於詹事府無定員無專授爲勲戚文武大臣兼官加官贈官或曰東宮公孤初蒞

禮記卷之八十五

詹事府 洪武元年李善長徐達兼 太子少師 太

子少傅治書侍御史文原吉范顯祖皆兼 太子賓客

二十五年立 皇太孫始以宋國公馮勝穎國公傅

友德兼 太子太師曹國公李景隆涼國公藍王 太

子太傅開國公常昇全寧侯孫恪 太子太保詹徽為

太子少傅兼吏部尚書茹瑋為 太子少保兵部尚

書

太子太師 太子太傅 太子太保以道德輔教 太

子而謹護翼之 太子少師 太子少傅 太子少保

奉 太子以觀三公之道德而教諭焉 太子賓客侍

太子規誨贊相禮儀而先後之

宰相

遼北面北宰相府掌佐理軍國之大政皇族四帳世預其

選南宰相府掌佐理軍國之大政國舅五帳世預其選

各有左右宰相二人下有總知軍國事知國事 南面

有大丞相左丞相右丞相平章事叅知政事等官列于

中書令下有左僕射右僕射等官列于尚書令下

遼有五京 聖宗時設東京中京南京宰相府各有左

右相左右平章政事 統和二十一年七月召北府宰

相蕭塔烈葛南府宰相漢王貼不及南北院樞密使等

賜坐論古今治道

金左丞相右丞相各一員從一品平章政事二員從一品

爲宰相掌承天子平章萬幾左丞右丞各一員正二品
叅知政事二員從二品爲執政官爲宰相之貳俱列于
尚書令下

海陵天德三年五月以戒勅宰相以下官詔中外

世宗大定二十四年閏十一月制外任官嘗爲宰執者凡
吏牘上省部依親王例免書名 二十五年十月以宰
臣年老艱于久立命左右置小榻廊下使少休息

章宗明昌三年尚書府奏知河南府程嶧乞進封父祖權
尚書禮部党懷英言宰執改除外任長官其佐官以下
相見禮儀皆與他長官不同其子亦得試補省令史且
祖父封贈禮當不同合與宰執一例封贈從之 承安

三年四月諭有司宰相遇雨可循廊廡出入

宣宗興定三年四月以天暑詔宰相四日一奏事

元宰相正一品銀印統百官率百司居中書令之次令缺
則總省事佐天子理萬幾初職官未定 太宗始置右
丞相一員左丞相一員 世祖至元後尚書省與中書
省更變不一丞相增減無定 武宗至大四年尚書省
仍歸中書丞相凡二員自後用之不易 至正間復有
添設左丞與右丞之名

平章政事四員從一品掌幾務貳丞相凡軍國重事無
不由之 文宗至順元年定置自後因之至順帝時復
有添設第三平章之名 至元十五上諭昂吉兒曰

宰相明天道察地理盡人事兼此三者乃為稱職爾縱
有功宰相非可覬回中如阿合馬阿里皆才任宰相
南人如呂文煥范文虎或可以相位處之耳

皇明

太祖即吳王位首建百司官遂以李善長為中書省右相

國徐達為左相國

仍元制尚右

常遇春俞通海為平章政事

汪廣洋為右司郎中張昺為左司都事因論善長等

曰卿等為生民計以推戴子然建國之初當先正

紀綱元民昏亂紀綱不立王荒臣專威福下移由是法

度不行人心渙散遂致天下騷亂今將相大臣當鑒其

失安協心為治以成功業毋苟且因循取充位而已又

曰禮法國之紀綱禮法立則人志定上下安建國之

初此為先務爾等為吾輔相當守此道毋謹於始而忽

於終也吳元年黥中書省叅議李欽冰楊希聖先是

李善長劾奏二人弄權不由執政太祖命黥其面云

姦狡百端詭譎萬狀洪武戊申春改中書省左右相

國為左右丞相左右丞各一人叅知政事二人以宣國

公李善長為中書左丞相兼少師徐達為丞相統六部

事巳酉冬太祖以事詰責丞相李善長劉基謂善長

勤舊且能和輯諸將上曰是數欲害汝汝乃為之地

耶太祖又欲以楊憲為丞相基素厚憲對不可上

恠之基對曰憲有相才無相器夫宰相者持心如水以

義為權衡而已無與焉者也今憲不然能無敗耶 太祖曰汪廣洋如何對曰褊淺觀其人可知又問胡惟庸如何對曰此小犢將償轅而破犁矣 太祖曰吾之相無踰于先生對曰臣非不自知但臣疾惡太深又不柰煩為之且孤 大恩天下何患無才願 明主悉心求之如目前諸人臣誠未見其可也 庚戌召山西叅政楊憲為右丞陝西叅政汪廣洋為左丞憲尋被誅 辛亥春正月太師右丞相韓國公李善長致仕以左丞汪廣洋為左丞相叅知政事胡惟庸為右丞相 癸丑春正月黜丞相汪廣洋為廣東叅政以柔佞急政也七月以胡惟庸為左丞相陳寧為御史大夫

惟庸濠州定遠人洪武元年為

大全書成翰林院學士兼左春坊大學士奉政大夫胡
廣奉政大夫右春坊右庶子兼翰林院侍講楊榮奉直
大夫右春坊右諭德兼翰林院侍講金幼孜上表進呈
蓋雖春坊官必須兼翰林院職銜方得預纂修之事未
有 殿閣大學士而獨任纂修之事者也然胡廣所兼
不過春坊大學士則是時 殿閣大學士不設已久矣
今尚書在 內閣辦事六部請 勅手本只云合用手
本前去翰林院寫 勅施行則舊意猶存可考也終永
樂之世二楊官止五品蓋爲衙門所拘初未有衙門小
官大之例 仁宗登極始以 東宮舊臣陞士奇爲禮
部侍郎尋陞少保兼 華蓋殿大學士楊榮爲太常卿

進 太子少傅兼 謹身殿大學士又陞工部尚書在
內閣辦事楊溥永樂間繫獄十年釋出擢翰林院學
士尋陞太常卿兼學士 內閣辦事此三人皆以 龍
飛超陞委任不可以例論也後楊溥丁憂起復不入閣
宣德間因九年三品考滿方陞禮部尚書學士如故
正統中復 命入 內閣四年修 宣廟實錄成進
少保楊士奇楊榮俱進少師號三楊初楊榮陞尚書不
過工部則不敢以兼官壓六卿之意可見然自官制一
變之後遂使雜流出身在 內閣書辦年久者亦得陞
至尚書至于序班道士亦以年資陞至尚書掌鴻臚寺
大常寺事皆三楊開其端也由是 內閣之權漸重無

英宗毒離父子之親敗亂天倫之正朕方在冲年蒙昧
致彼愈爲欺侮其時幸賴 皇天垂鑒 祖宗默佑以
今輔臣張璪首倡正議忘身捐命不下鋒鏑之間遂致
人倫潰而復叙父子散而復完厥功具載莫可泯遠朕
念璪等忠 王事授以重職擢居輔導欲其全 君臣
始終之義之美奈何璪等自居官以來不思圖終之難
頓忘謹始之志自用自恣負 君負國所爲事端昭然
衆見而桂萼尤甚近以言官屢劾朕不敢私論法本當
置諸刑典特從寬貸璪令還家愴悵以資後用萼奪其
敬官併學士職銜回籍致仕其餘黨分別區處庶幾仁
之中義之公兩盡焉又照給事中孫應奎王準陸粲居

言官之列有耳目之寄既知大臣若斯却乃坐觀至此
方行舉劾實非忠愛之本心亦負 朝廷之委任者也
應奎首爲進言姑免究陸粲已究外王準也着法司提
了問茲特 諭爾文武群臣庶令咸知朕意其璉等既
已處置了他每罪固不可掩而功尤不可掩內外大小
官員軍民人等不許乘此挾私離奏擾敢有違的決行
重治不宥尚賴文武群臣協心同力匡朕不逮凡近日
所行事務有未當者都着條奏更正可行的不許一槩
混開勿得罔 上縱私効倣爲事事或敗露法典具在
必罪治之爾禮部便轉行都察院刻布天下悉使知之
故諭 十年某月日 勅諭三法司薛侃以猖狂之性

發不諱之言據其言似忠謀遠慮但朕非宋仁宗向慕
之年原其心實懷欺罔忍於言 君終無建嗣之期妄
生異議致惹事端法司擬罪來看彭澤質非有用性本
無良小人狡詐之資奸邪譎詭之行往來構禍搬弄是
非致薛侃招稱有干 宗室傷朕親親之情俾輔臣急
於攻擊害朕 君臣之義罪犯深重法當處死姑從寬
宥發邊遠地面充軍輔臣張孚敬初以建言大禮朕特
不次進用既而被人彈劾有 旨令其省改却乃不慎
於思罔悛於性朕心腹是托奚止股肱而已望以伊傳
之任豈惟待遇是隆乃昧休休有容之量犯戚戚媚嫉
之科殊非朕所倚賴專於忌惡甚夫丞弼之任難以優

從着致仕去夏言既于斯事無干不合拍案喧罵匪徒失儀亦涉爭報念其被害所激赦而不問孫應奎曹汴職在糾舉豈責彼言但其時事未明白遽斥輔臣跡涉回護故朕併令拿問今念係言官亦從赦放其餘見監人犯悉宥之此事既經區處爾在朝大小官員宜思革除私忿務為盡忠効古人事君同寅協恭之心守聖人事君不貳不欺之訓匡朕不逮以臻至化庶不負其君忝其親永有譽聞二十一年六月朔之次日手勅諭都察院近日人事愆違天垂仁愛雨澤方至禾茂民康今雨下竟朝矣丞弼之臣宜忠敬清亮者居之故言其望調和之職也朕承皇天眷命以神

王二道裁理天下非求仙用夷荒昧之為止是一早朝終始不一耳然君逸臣勞務本抑末失小顧大先賢用之朕雖失此早一臨門視多命攝愛此身僉是父母遺我者宗禮帝神加志天下不會色荒聲迷於不省人事之地無一時不思天下付民上賴為人君之職所當懼者柰何世降人浮求一人才夾輔卒不可得昨夏言測東宮遷移無故稱改慈慶為東宮府夫廢母后悖制以縱奉子朕必不為言前稱朕意為正駁郭勛為非今何一用勛言若今謂為忠正前亦忠正前謂為非則今亦非也夫嫉人賢已必欲美皆已出惡亦無歸夫何謂郭勛以不領勅下獄矣猶千羅百織如何自

擬君旨謂不必用 勅言官係朝廷耳目一大不
如專一聽受主使逆君沽譽傾人取位以奉所悅或
戕人一家以代報復吁是人爲乎又凡工作例有內官
監官作撰大享殿興工何無高忠勅稿前歲忠代
言進玉噐祝壽朕已疑其與彼同計矣今果通泄朕
言不具勅稿果無例耶果不通誠耶昨又聞乘轎
苑中次日朕以香葉束髮巾用皮皂鞋以便跪起彼謂
不可夫無賜而自乘擅也有命而抗違非禮也且
朕不早朝彼亦不入內閣軍國重事徑自私家而專
裁之王言要密豈宜人臣視如戲具如此大事言官
豈無一人知見不聞一言片疏糾發徒知欺諂君主

弄法舞文排擠忠直貪生媚寵今日神鬼皆怒雨甚傷
禾卿等布諭俾中外知之時言待罪於家又十五日
降口宣召入拜皇考諱辰御仍直候內苑禮成言
具疏謝罪留中至七月朔奉御批言始因朕諭孕
敬令上疏論郊禮漸階寵用出群臣之首累次放恣欺
慢全無驚懼面諛退誹深負朕恩遇優禮之甚屬當日
食太重正坐下慢上之咎令革職閒住已乃降勅諭
禮部曰今日仰天心下眷本朕不才累及太陽正坐
臣子欺逼君父外陰侵犯內陽之咎夫天子者有
臣道焉豈可居母位以匹天是一失厥當退處本位夏
言以臣欺凌君上作威作福不下郭勛之罪但卿五

六人累年供事 內苑讚誠左右獨因此切軫朕心故
免死去之用仰承 天戒是二失中華陽外夷陰令夷
犯華若蹈荒原可見此時內外臣工通不愛民如身視
國如家是三失若是三咎厥災甚大伏荷 皇天降示
朕丕感弗勝即於明日為始修省三月初五日躬祇告
于 玄極殿內外大小百工宜各洗淨乃心修舉乃職
目即戎務為急司其事者盡心圖濟用保吾民禮部刊
刻頒布天下敬哉敬哉 詳夏之得罪每以偃蹇傲惰
見咎而迄不知省以致敗慘 先是十八年五月己巳
上幸大峪山閱視 陵工 內閣以居守 劾稿進
覽遲緩 上不悅因責輔臣夏言欺慢狀言具疏引罪

曰言自微宮朕 命張孚敬示令建贊 郊

禮之儀遂不次進官其所倚任皆 朝廷恩眷自當益
屬公勤蓋忠事 主乃每每怠慢不恭昨所選擬宮僚
多不稱用密疏既不遵式却借封皮以便私情既不遵
奉 原賜印記并歷年 御帖可即進繳 御前雖無
稿其數尚可查考無得隱匿取罪空痛自省改以供職
業言復自陳臣一介凡庸遭逢 聖明在上追惟 郊
禮之議雖小有論贊寔首發自 淵衷成以 睿斷臣
實何知何能遂蒙顯拔不次進用臣非犬馬草木敢不
思感 恩圖報分萬一昨 扈從南巡偶以疾昏迷時
典禮方殷因勉強赴閣供事至於錄進舊文併撰居守

勅稿既失稽遲而密疏之陳又屢違 欽式不意

聖度優弘勉之省改使得自新臣於此惟有感激流涕
痛自悔省而已復欽奉 聖諭令以 原賜印記并歷
年 諭帖進繳臣於恐懼待罪之餘尚有意外祈 恩
之望蓋印記之文乃 特賜嘉獎 聖諭諸帖皆 親
灑宸翰比隆於典謨訓誥已編之 御集當傳之萬世

惟是臣之家藏實臣一時遭遇之榮爲子孫百世之寶
今一旦追取臣忍舍之伏望重加矜念仍以 賜臣或
別加罰治則臣死且不朽矣疏入 上曰言既寶 君
命手澤可見其實有 旨追取數日不繳必有殘壞禮
部即取進繳姑念昔日贊議 郊典革其勛階少師官

職其以少保兼尚書學士致仕言乃檢 手勅 諭帖

自嘉靖九年起至十八年共四百餘道爲十二匣銀印
記一顆具疏上之 上諭吏部閣臣夏言初出朕簡用

首因奉祀建贊 比郊茲典至大言知之真正克贊成
之朕嘗曰昔孛敬爲綱常立論正吾父子之名言不忌
禍患能贊吾復 皇祖初禮二臣於我有助不意言以
惰慢之資超進丞弼之任身居是位猶不警勵昨已令
去之然朕復念言建助大儀力贊 陵議復他少傳兼

太子太傅禮部尚書 武英殿大學士還閣辦事贊
終喪禮宜省思盡忠未可怨尤其君上也即日任事初
言既罷政將行詰 闕辭 上遣司禮官止之 命還

家候 旨隨降是 諭言即進閣上疏謝 上報曰覽

卿已起閣朕知悅已卿宜益勵初忠盡心輔政事秉公
持正不惟副朕任亦免衆忿也卿其思之言復疏謝且
言自處不敢後於他人一志孤立爲衆所忌 上覽之

不悅隨詰責之并硃塗疏中洗改字數處言乃惶恐引
罪得 旨報聞亡何 上以 奉先殿雷震召大學士

夏言顧鼎臣往視時畧已移辰矣而言等尚未入政府
上不悅曰輔臣朕所憑倚恣逸若是何以表率群工
命禮部劾之言等請罪 上曰朕每寬言過非爲言

爲左右義重也言乃傲惰成性蔑不知儆其何以表率
百僚鼎臣亦相效既已知罪姑宥之自後諸司敢踵過

寅之詔凡三褫矣 戊申兵部議復三邊侍郎曾銑

河套疏 上以言主議銜之下問 內閣露意大學士

嚴嵩遂攻言 上批謂言於銑疏初至時乃密疏稱人
臣未有如銑忠者朕已燭其私但知肆其所爲不顧

國安危民生死惟徇魯銑之欲云云言懼自辯 上批

答爾等 朝廷倚政之本自宜先以邦民爲心如何專

徇私情強 君脇衆昔密奏未允乃詐稱 上意必行

茲所奏又無引罪詞吏禮二部會都察院叅看以聞部

院叅言事惟任意跡涉強 君 上曰爾等奉 旨議

奏猶謂跡涉此非媚即畏是何國體姑不究夏言削奪

餘官以尚書致仕尋捕曾銑子淳及言翁婦下獄得其

交通事狀 詔夏言着錦衣衛差官校逮繫來京問三
法司謂言法固當斬以直侍多年効有勞勩據律有議
能議貴之條請自 上裁 上怒曰爾等任曰執法豈
不知 恩威當自 上出乃敢借意朋護朕視言爲腹
心言則視 君爲何方銑疏上時即密奏強 君朕何
嘗一言論答敢動稱有 密諭主行及事敗止令致仕
又不知引罪故作怨語曰前去因不帶香巾爲 朝廷
計非以身家是人臣禮歟彼正以 西內二三月直候
不得見蘇綱爲辭爾等又爲言直侍 內苑堅恣朋護
之私是何法理其更擬奏遂同銑原坐交結近侍官員
紊亂 朝政律斬妻子流三千里及秋竟不免

穆宗隆慶三年五月吏部缺尚書方奉 旨會推忽傳

中旨起高拱以少傅兼 太子太師吏部尚書 武英
殿大學士入閣預機務掌吏部事明年二月 諭免奏
事承 旨故事 召內閣輔臣必遣行人以示優眷時
吏部不以例請而移咨兵部遣一指揮往拱街之遂與
閣寮漸不相能 四年二月都御史王廷去位以禮部
尚書 文淵閣大學士趙貞吉掌都察院事 六年六
月傳 皇后懿旨 皇貴妃令旨 皇帝聖旨說與內
閣五府六部等衙門官員 大行皇帝賓天先一日召
內閣三臣在 御榻前同我母子三人親受遺囑說
東宮年小要你們輔佐今有大學士高拱專權擅政

朝廷威福都強奪自尊通不許 皇帝主管不知他
要何為我母子三人驚懼不寧高拱便着回籍閒住不
許停留你每大臣受 國家厚恩當思竭忠報 主如
何只阿附權臣蔑視 幼主姑且不究今後都要洗心
滌慮用心辦事如再有這等的處以典刑

吏部不以阿諛而遂容兵暗畫一昔與共商之參與
事舉以青郊舉人召內閣轉日必數計入以示慰養和
與大學士人閣辭對總掌吏暗事即半二私區補京奏
中書張高拱以少卿兼 太子太師吏部尚書侍海英
宗劉夢三平五日吏部始尚書文奉 旨會葬感朝

續文獻通考卷之八十六

皇明進士雲間王圻纂輯

職官考 四輔 宰相屬官 給事中 符寶郎

翰林院 史官

四輔

皇明

太祖吳元年置四輔官尋罷之先是雷震謹身殿 太祖
感天變因置是官時龔敷字文建江
西沿山人學博行淳鄉里推
重以明經辟為教授尋以御史葉孟芳薦被徵及杜敷
趙民望吳源兼 太子賓客位列公侯都督之次秩正
三品告于 太廟必欲德合天人均調四時以臻至治

杜敷壺關人勤慎力學精易書詩又耆儒王本李佑安邑人

皆至太祖坐武英殿西廡召見使言志皆對曰不

敢上負聖明自棄明時遂擢本佑龔敷為春官杜敷

民望源為夏官秋冬官缺以本等攝之嘗諭令沐浴

致齋精勤國務或賜勅獎之每賜坐講治道且

各圖像賜衣三襲又賜待漏院記未幾龔敷致仕

再起為國子司業陞祭酒因監生告假不奏聞上怒

其賣放坐罪免杜敷疾卒本犯極刑召前御史安然

代之然潁川人又云祥符仕元為左丞守萊州大將軍

下山東然來授起居注改給事中尋擢山東行省參政

洪武二年擢為工部尚書五年拜河南行省參政九

年改擢江浙布政使十二年召為御史臺右大夫明

年改左中丞五月坐事免至是召為四輔官每論事

賜坐多所裨益卒年五十八上親製文遣官祭之

源先為興化府教授後以中書舍人林廷綱薦被徵尋

皆坐黜惟李佑以老疾還鄉此職遂廢

宰相屬官

宋寧宗嘉定九年袁燮請增置宰屬疏畧曰臣聞人主不

能躬親庶政故必擇忠賢以為之屬然宰屬者朝廷政

事靡不關焉顧不重與故神宗皇帝嘗謂左右司所以

學為宰相洋洋乎帝王之格言也臣嘗觀周禮天官冢

宰之職雖有百官群有司無所不統而獨於其為宰屬

考表而出之故其序官曰太宰卿一人小宰卿中大夫二人宰夫下大夫四人上士八人中士十六人下士三十二人自小宰以至旅下士合六十有二人皆宰屬也其品秩雖不侔然與聞國政足以裨太宰之所不逮者均焉耳太宰以輔佐人主爲職而爲屬者又以彌縫太宰爲職合衆多之謀智講國家之利害豈復有所闕哉今之宰相古太宰之職也太宰之屬至於六十二人而今之爲宰屬者不過數人何其多寡之甚相遠哉蓋自漢而下寢不如古所謂宰屬者惟曰長史曰司直曰公府掾而已去古益遠法制益隳而堂後官始得以用事我藝祖皇帝知堂吏之奸賄也開寶五年詔選令錄簿尉爲堂後官以士人代之取其究心儒學通知古今足以爲宰屬之助與吏胥固不侔也自時厥後任吏如故蔡京兼政陰與交結更相表裏而紀綱日隳矣今陛下更化以來垂意宰屬精選才能之士以戢堂後官之奸可謂盛舉然政事不勝其多而宰屬不過數人耳目不能徧察思慮不能周知速則鹵莽緩則壅滯甚非所以彌縫宰輔也而况邊境未寧干戈未息正國家多事之秋有大議論有大更張必得人以共圖之自從臣以下謁見宰輔不過一再耳豈能如宰屬之無時不見款密無間哉當世所切不容少緩伏惟陛下明詔二三大臣增置宰屬雖未能復成周之制亦宜求賢俊秉心公正

者共濟國事則所補者多矣惟聖主亟圖之

遼宰相屬官有堂後官有守堂官有令史

金元無考

皇明 國初設立相國平章左右丞奉政即古宰相之職

故置左右司郎中都事等官爲之屬至 洪武十三年

革丞相餘官皆革後設殿閣大學士備顧問並不預政

故不置屬景順以後機務繁重而 內閣 制 誥兩

中書舍人以書辦供事朝夕即古之宰相屬也選用或

由進士或由舉人監生儒士以纂修効勞者亦得入始

稱清華之秩矣

內八府宰相附

宋遼金無

元制內八府宰相掌諸王朝聘償价之事遇有詔令則與

蒙古翰林院官同譯寫而潤色之謂之宰相者其貴似

侍中其近似門下故特寵之以是名雖有是名而無授

受宣命品秩則視二品

按輟耕錄曰內八府宰相視二品秩而不降受宣命特

中書照會之任而已寄位於翰林之埽隣埽隣者宮門

外院官會集處也所職視草制若詔赦之文則非其掌

也至于院之公事亦不得與焉例以國戚與勳貴之子

弟充之

皇明不設

續文獻通考

中書省

宋度宗咸淳九年三月置機速房於中書襄城既失賈似道復上書言事勢如此非臣下馳驅聯絡氣勢將有大可慮者帝曰師相豈可一日離左右似道乃建機速房以革樞密院漏泄兵事稽遲邊報之弊

舊宰相繼以門下省而主封駁之事其給事中諫議大夫起居注補闕拾遺與典儀城門符寶皆屬官也宋自紹興中廢門下省而元因之故今繼以中書省及其屬官而給事中等官仍附於中書省祿屬之後通事舍人之上其間以門下省者遼所置也

遼南面中書省初名政事省太祖置 世宗天祿四年建政事省十二年改中書省

金初置中書省海陵正隆元年與門下省同罷

九世祖至元七年議立三省侍御史高鳴上言臣聞三省設自近古其法由中書出政移門下議不合則有駁正或封還詔書議合則還移中書中書移尚書尚書乃下六部郡國方今天下大於古而事益煩取決一省猶曰有壅况三省乎且多置官者求免失政也但使賢俊萃于一堂連署參決自免失政豈必別官異坐而後無失政乎故曰政貴得人不貴多官世祖深然之

中書令

遼南面中書省置中書令太祖時韓延徽韓知古及趙延

續文獻通考

卷之八十六

四

四百六

續文獻通考卷之八十一 五
壽皆嘗為之其次有大丞相左丞相右丞相見宰相目而繼
以知中書省事中書侍郎中書平章事中書參知政事
元

初置中書令一員銀印典領百官會決庶務太宗以相臣
為之世祖以皇太子燕之至元十年立皇太子行中

書令大德七年定中書省官員數自左右丞相而下

平章二員左右丞各一員秩正二品副宰相裁成庶務

號左右轄參政二員秩從二品副宰相參大政十一

年以皇太子領中書令八月時武宗已即位時又定中書省臣

員數省臣言比年議省官員數有旨依舊制定為十二

員右丞相塔剌海左丞相塔思不花平章珠木兒乞台

普齊如故餘令臣等議請以阿沙不花塔失海牙為平

章亭羅荅失劉正為右丞郝天挺也先帖木兒為左丞

于璋烏伯都剌為參政其班朝諸司冗員並宜簡汰從

之延祐二年復以皇太子行中書令置屬監印二人

至正間復有添設參知政事添設參政之格

趙天麟上策曰臣聞未宜輕舉者四海之宗不可常空

者三台之位是以貞臣守道虞人違析羽之招明主防

微漢帝拒郎官之請斯皆小節尚貫大經矧此國基係

乎太子方其幼也但可齒學而振風及其長也但可安

心而行孝奚暇守他事哉今國家舖張治具整頓條綱

內焉三公九卿外焉庶彊諸尹例皆舉賢推德使擇高

下之員務撥本司嚴糾傾邪之類蓋欲有生皆樂無物
不安旁推惻隱之心迺續文明之治至於中書一令樞
密一使嘗使東宮領之連旬累月望儲闈銅輦之來臨
虛榭空帷設銀架金墀之六坐事雖專于副相政實決
於同僚臣以爲中書者機務之關津天門之鎖鑰挈四
海蒼生之命掌萬春皇闕之家任之而當則莫枕磐石
任之未當則瘵官病政此實國家股肱心膂之臣也樞
密者疆場之守衛熊虎之維綱武臣効力而有所歸依
強寇寒心而潛消變故良才司令則坐撫塵清昧者持
衡則多生僻事此實國家爪牙統領之臣也由此觀之
軍民一柄治亂所關具其員而非其才尚恐難行設其
位而曠其官如何可治且太子正名之後雖諸王莫得
而同有三師三少之徒立詹事屬官之院凡在臣民而
咸仰但惟父母之常尊君行則守有守則從從曰撫軍
守曰監國爲天子之元子任天下之副君又何須銀章
或玉帶輝一品之華階宥府都堂占大臣之上位名爲重
之實所以輕之也東宮之領此職非臣之所獲知若謂
籍其重以鎮之耶則朝廷政事無不奏聞是天威已鎮
之矣何須太子哉若謂他人不可爲此職耶則太師太
保國王暨列公爲之矣太傅司徒亦有爲之者矣觀彼
四職不下於此皆令異姓爲之何獨人不敢爲此職哉
况耶律令已嘗作中書令乎太子之道春誦夏弦秋習

禮冬讀書研磨往古之攸行爰証當今之所務龍樓問
寢愍勤乎內豎之前甲館尊師懇惻于春官之側以徽
柔爲本以仁孝爲先及其旣冠則有記過之史徹膳之
宰進善之旌敢諫之鼓習與智長故幼而不媿化與心
成故中道若性三代之胤祚長久者以輔導太子有此
具也太子之善在于早諭教教得而左右正則太子正
矣太子正而天下定矣此所以周公示法於成王賈子
忠告於漢文也以陛下之聖猶立保傅在太子奚以疑
伏望陛下慎選碩人輔導太子無令降居臣職以輕其
身當使益增聖明以成其孝如此則軋符永握黔黎知
大本之安震德維新天地有長男之筭更望陛下近擇

宗室旁及巖穴舉大賢充令史之官即聖主錫軍民之
福也

按元中書令爲極尊次則左右丞相平章政事左右丞
叅政叅議中書省事左右司郎中皆叅贊中書者
成宗元貞元年六月勅上書者令中書開視以聞

叅議中書省事

元世祖中統元年置叅議中書省事秩正四品典左右司
文牘爲六曹之管轄軍國重事成與決焉員數自大
德元年改定爲四員其治曰叅議府 順帝至正七年
又置中書議事平章四人

按叅政與叅議古無其官唐太宗時杜淹以吏部尚書

參議朝政魏徵以秘書監參預朝政其後或曰參議得失參知政事皆宰相之職設府自元始

左右司郎中

元世祖中統元年中書置郎中 至元十五年分置右司左司郎中二員正五品員外郎二員正六品都事二員正七品右司亦如之左司所掌禮吏房之科有九一曰南吏二曰北吏三曰貼黃四曰保舉五曰議禮六曰時政記七曰封贈八曰牌印九曰好事知除房之科有五一曰資品二曰常選三曰臺院選四曰見闕選五曰別里哥選戶雜房之科有七一曰定俸二曰衣裳三曰羊馬四曰置計五曰田土六曰太府監七曰會總戶糧房

之科有六一曰海運二曰僨運三曰邊遠四曰賑濟五曰事故六曰軍匠銀鈔房之科有二一曰鈔法二曰課程應辦房有二一曰飲饌二曰草料令史二人蒙古書寫一十八人漢人書寫七人典吏十五人右司所掌兵房之科有五 一曰邊關二曰站赤三曰舖戶四曰屯田五曰收地刑房之科有六一曰法令二曰弭盜三曰功賞四曰禁治五曰枉勘六曰鬪訟工房之科有六一曰僨造軍器二曰常課段匹三曰歲賜四曰營造五曰應辦六曰河道令史以下畧同上

中書省掾屬

元中書省監印二人掌監視省印有中書令則置知印四

人掌執用省印怯里馬赤四人蒙古必闌赤二十二
左司十六人右司六人漢人省掾六十八人左司三十九
人右司二十一人回回省掾十四人左司九人右司五
人宣使五十人省醫三人王典赤四十一人

斷事官秩三品掌刑政之屬元初嘗以相臣任其名甚
重其員數增損不常其人則皆御位下及中宮東宮諸
王各投下怯薛丹等人爲之 至元八年始給印二十
七年分立二省斷事官隨省並置首領官經歷知事各
一員吏屬蒙古必闌赤二人令史一十二人回回令史
一人怯里馬赤二人知印二人奏差八人典吏一人客
省使秩正五品四員副使二員正六品令史一人掌直

省舍人宣使等員選舉差遣之事至元七年始置直省
舍人二員後增至三十三員掌奏事給使差遣之役

檢校官四員正七品掌檢校左右司六部公事程期文
牘稽失之事書吏六人大德元年置

照磨一員正八品掌磨勘左右司錢穀出納營繕料例
凡數計文牘簿籍之事中統元年置二員後省爲一典
吏八人

管勾一員正八品掌出納四方文移緘騰啓札之事郵
遞之呈期曹局之承管兼主之中統元年置二員後定
爲一典吏八人

架閣庫管勾二員正八品掌藏省府籍帳案牘凡備稽

考之文即掌故之任也至順初定爲二員典吏二人蒙
古回回二架門庫各管勾一員典吏一人

世祖至元七年趙天麟奏論都省行省職掌其畧曰臣聞
車輿之樞要在於管轄衣裳之提綱係於要領要領不
可以兼樞袂之資管轄不可以兼輶衡之用蓋器殊緩
急則一無爲萬有之宗名限重輕則一貴乃群卑之仰
軒轅置六相而以風后等爲之天乙立二相而以伊尹
等充之是時爵分萬國國建諸侯及嬴秦罷侯而丞相
號起自是以來累朝相效其增損之制難以勝言其高
下之秩例皆極品儀刑端禁總領紀綱掌一人家事之
張皇作四海士民之倡率金章紫綬黃閣沙堤非惟詭

殊異之丰儀所以示尊榮而委重也既資厚望當振清
風我國家內立中書外立行省行省以革藩鎮諸侯之
專中書以分公卿大臣之任防微之理亦已至矣樹治
之法可謂盛矣然猶有未盡輒敢妄陳竊見中書內省
密邇皇宮統餘省於上游弼聖躬於中域但當坐而論
道據槐府以秉鈞寬以宅心守台司而助化今也汴梁
以北北京以南西界長安東窮遼海釐毫細務靡不相
煩升斗微官亦來取決豈非管轄兼輶衡之用要領兼
樞袂之資乎伏望陛下載崇都省申以大名諫院隸焉
六部隸焉自烏臺相府所統之外隨朝九品以上亦皆
隸焉選才德無玷地望極清者爲大中書令其丞相平

章丞轄叅政以至府之叅議院之諫官暨郎官都事之
司成冠以左右之號凡宰執朝會商確萬幾常以諫官
班於厥次有關斯補有遺斯拾如此而聖德加明治具
畢張矣凡都省移文於行省以咨付付之行省移文於
都省以咨呈呈之凡都省事關行省行省一切合稟事
務咨呈於都省都省判送六部擬而呈之轉咨行省以
行凡隨朝九品以上及外路受宣命以上官都省注之
如此而宰執益崇政事益簡矣更望陛下於腹內取中
別立一省謂之燕南等處行中書省以汴梁北京遼陽
安西省之間凡外路受勅牒以下官行省注之然後咨
呈都省乞頒勅牒可也凡隨朝諸有司當受付身者委

都省出之凡外路諸有司當受付身者行省出之如此
則上庶遠地而堂陛愈高都省增崇而天王益重矣或
者以爲國家因四遠及蠻荆之新附故立行省以鎮之
腹內不須立也殊不知汴梁有省豈汴梁亦新附之域
哉事在不疑惟陛下察其可否而行之

門下省

遼南面設門下省

金初亦設正隆時廢 元不設

侍中

遼南面門下省有侍中 太宗會同時趙思溫嘗居此職

金廢門下省無侍中 元亦無

門下侍郎

遼南面門下省有門下侍郎
清寧時楊哲居此職
金元不置

散騎常侍

遼南面門下省有常侍常侍之下有散騎常侍
天祚時
馬人望居此職

金中常侍乃內侍之職屬宣徽院
元無

皇明

國初設中書省正一品有左右相國
洪武元年改左右
丞相各一人左右丞各一人叅知政事二人總領眾職
分錢糧禮儀刑名營造四部其屬左右司郎中各一人

員外郎各一人都事各一人中書舍人二十人是年始
置吏戶禮兵刑工六部正三品設尚書侍郎郎中員外
郎主事統於中書省以滕毅楊士義錢用壬陳寬周禎
單安仁爲六部尚書入見奉天殿
諭曰朕肇基江左
軍務方殷官制未備今以卿等分任六部國家之事總
之中書分理六部至爲要職凡諸政務宜竭心爲朕經
理或有乖繆惠及天下不可不慎
五年定六部職掌
歲終考績以行黜陟
九年增戶部爲五科刑科四科
工科四科設尚書一人侍郎一人郎中二人員外郎二
人主事五人
十一年禁六部奏事不得關白中書省
十三年誅右丞相胡惟庸詔罷中書省止存中書舍

人

按周六官廢而秦及列國皆設丞相其重者曰相國掌
丞天子佐理萬幾漢設一丞相以御史大夫副之後改
曰大司徒東漢因立司空而權移於尚書令僕自漢以
至宋其省或尚書門下中書其長或令或僕或僕射其
佐或叅知政事或左右丞或侍郎皆為人主理庶務無
所不統攝蓋真為相而名避之三公為貴官以加其資
格之重者而南渡以後至孝宗正其名曰左右丞相其
佐仍曰叅知政事元因之署中書省令一員正一品以
皇太子為之左右丞相同品同令平章政事從一品左
右丞正一品叅知政事從二品叅議正四品

高皇帝即大位仍置中書省罷令不設餘俱如故 洪武

三年革平章政事 十三年以丞相胡惟庸專僭誅之
因罷中書省散其柄於六尚書而係之甲令曰後有請
立丞相者文武群臣劾奏其人凌遲處死嗚呼聖矣
百餘年來 天子不能獨斷事權必有所寄不能不歸
之內閣而至嘉靖中遂操丞相之柄萬曆初幾並人主
之尊數年以來半歸內侍而閣臣拱手受成勢極矣不
可不變而通也見弇州集

中書舍人

遼南面中書省設中書舍人院有中書舍人 景宗時見
室暉 道宗時見馬鉉 金元無

續文獻通考 卷之八十六 三百九十五

皇明

國初丙辰始定中書舍人凡二十員正七品先是屬中書省後革 七年改直省舍人從八品 九年始定為中書舍人正七品隸承勅監監省革改從七品凡 恩廕寄錄及 文華殿門東房內閣 誥勅 制勅房分直者無定員 建文中改侍書入文翰館 靖難後復故按楊一清曰此官存古制也所典司 天子辭命 親王郡王并妃初膺封號合受金銀冊則書之自郡王以下至奉國中尉自王夫人以下鄉君合給 誥命則書之凡公侯伯初受封爵合給鐵券凡勳戚内外文武官應給 誥命 勅命則書之其職掌至重也每大朝會

則椒四員與翰林史官上殿東西班對立凡 東宮節令朝賀定擬二員文華殿導 駕侍班 凡會試一員入場收掌試卷日給大官酒饌與翰林宮坊尚寶司六科同為侍從之臣諸司無相並者其地勢至清也其選用自進士外舉人與纂修書成被 恩典者乃得之監生儒士有勳勞大臣暨 宮僚講官有子孫宜承廕叙 奉 特旨者乃得之用之亦非輕矣

穆宗隆慶四年吏部覆郭諫臣奏 制 誥兩房中書官不得陞列九卿

按中書舍人無正貳印屬之年深者掌書 誥勅 冊符鐵券凡草請翰林院寶請諸 內府左券寶籍歸諸

古今通集庫凡 誥勅勘合籍以急就章為號凡 誥勅之號四曰仁曰十二支曰文行忠信曰千字文字以千號為滿滿則續

給事中

遼南面門下省有給事中次于散騎常侍 聖宗時郭蝦居此職

金給事中從五品屬宣徽院給事局使正七品副使正八品屬衛尉司

元世祖至元六年始置起居注左右補闕掌隨朝臺省院諸司凡奏聞之事悉紀錄之 十五年改陞給事中兼修起居注左右補闕改為左右侍儀奉御兼修起居注

秩正四品後定置給事中兼修起居注二員左右侍奉御同修起居注一員令史一人譯史一人通事兼知印一人

皇明

國初統設給事中正五品 洪武四年改正七品 六年始分為六科各設給事凡八十一人從七品 十年隸承勅監 十二年改隸通政司 十三年置諫院左右司諫各一人左右正言各二人 十五年以兵部尚書唐鐸為諫議大夫 二十二年改給事中數符元士改為元士後又以六科政事本源改為士源未幾復為給事中 二十四年每科增都給事中一人正八品左右

續文獻通考 卷之八十五 四十七

給事中從八品改給事中正九品尋又改都給事中正
七品左右給事中給事中並從七品 建文中華左右
給事中 靖難後復故 景泰三年命都左右給事中
坐御史上吏戶禮兵刑工科各都給事中一人左右給
事中各一人給事中吏科四人戶科八人禮科六人兵
科十人刑科八人工科四人監生六科四十人 萬曆
中戶科革給事中二員禮科革一員兵科革二員刑科
革二員

六科掌侍從規諫補闕拾遺分察六部之事而糾其弊
諛凡臣民題奏下讀而署之駁正其違失凡 制勅宣
行大事覆奏小事署而頒之有失執奏封還凡百司官
非其人政失其理露章班劾或封章奏劾凡日朝六科
輪一人侍殿廷左右執筆記 旨凡大事廷議大臣廷
推大獄廷鞫掌科預焉凡 旨下東科類吏科西科類
兵科日早朝進揭帖凡諸司題奏日附科籍五日一銷
註覈稽緩朝參門籍六科流掌焉內官傳 旨下補奏
得 旨而施行之

吏科事例

凡各衙門大小官員不由吏部銓選推舉徑自朦朧奏
請乞 恩傳 旨陞除等項本科叅出施行 凡雜流
異途出身及年遠遺例妄行陳乞錄廢者本科叅奏治
罪 凡內外衙門及巡撫巡按等官保舉官員未當或

交通嚙毛濫保官員本科俱叅出施行 凡各處領
勅方面官員嘉靖二十六年令撫按官不許輒放離任
違者本科糾奏

兵科事例

凡午門外直宿將軍於夜間或因祭祀遞出鑰匙或以
物投下試驗警忽將軍即赴科來報早朝本科官引至
御前奏知 凡廠衛獲功人員每三年一次類奏覈
實遵照格例陞賞嘉靖二十五年令凡違例者本科劾
奏

六科通事例

凡內宮內使傳 旨各該衙門補本覆奏再得 旨然
後施行 凡文武官員違例乘轎及武官上馬用交牀
出入乘小轎者嘉靖五年題准聽六科糾劾從重罰治
降調 凡闡朝每月定委給事中二員分東西班與糾
儀御史會同鴻臚寺錦衣衛清查以革詐偽
丘文莊曰我朝始分六科設都給事中左右給事中隨
其科事煩簡而設員凡奏章出入咸必經由有所遺佚
牴牾更易紊亂皆有封駁不特此也凡朝政之得失百
官之賢佞皆許聯署以聞實兼前代諫議補缺拾遺之
職 祖宗設官不以諫諍名官欲人人得以盡其言也
而又專寓其責於科道吁四海無不可言之人百官無
非當言之職於泛然散處之中而寓隱然專責之意設

系文獻通考卷之八十一
四百四十一
官之意微矣

葉盛曰六科衙門專在磚城內尚寶司西永樂中災暫于午門外直房署事遂至今仍之

世宗嘉靖庚寅秋給事中夏言疏云六科額設都左右給事中給事共五十八員中間事有煩簡故員有增損然以司諫諍備獻納則六科之職均也祖宗以來額員俱備後來乃有不盡補者然遇都左右給事中缺五員以上則必奏請陞補各科給事缺十五六員以上則必奏請選補亦為著例在先朝五十八員一時補足當時侈為美談蓋增置諫垣自是盛代之事今六科在任止二十一員不及額數之半吏科缺左給事中一員給

事中四員戶科缺給事中七員禮科五員兵科九員刑科七員工科四員共缺三十七員六科除都左右給事中之外惟給事中四員而已供事趨走日不暇給欲求優游侍從以盡文墨論思之長從容退食以致寅恭謀議之實不可得已然其間言事者連輒被斥忤時者又多外遷歲消月減以至于今莫可復也考之祖宗舊規凡給事中有缺止于進士年三十以上者考選奏補弘治間始以行人博士兼選正德間始以在外推官知縣照御史例選補正德末年大臣畏忌新進敢言乃始盡廢進士考選之例陛下登極之詔命今後照依舊例給事中有缺于進士內考選奏補御史有

缺進士與行取人員相兼考選然應 詔止于一行而
旋復寢吏部亦嘗奏請廟堂大臣陰行格沮往往以未
嘗經歷世故藉口是不過欲得脂膏媵媵愛身固祿之
流取其不為已害而已司馬光曰凡擇言事官當以三
事為先一不愛富貴次則重惜名節次則曉知治體今
當用光言以為取人之則將見在各衙門辦事進士及
歷俸二年之上行人博士并推官知縣三年考滿到部
者查照舊規及見行事例具奏從公考選奏入 世宗

嘉納

穆宗隆慶元年令給事中係近侍封駁之臣例無考語
諫議大夫

金諫院無所屬設左諫議大夫右諫議大夫皆正四品左

司諫右司諫皆從五品

元時馬祖常疏人為諫議大夫然不見用

皇明諫議屬臺省不設此官

起居注

遼南面門下省屬有起居舍人院其官曰起居舍人曰知

起居注曰起居郎

金特設記注院修起居注掌記言動 明昌元年詔毋令

諫官兼或以左右衛將軍兼 貞祐三年以左右司首

領官兼為定制

元世祖至元五年中書省臣言前代朝廷必有起居注故

續文獻通考

卷之八十一

三百五十五

善政嘉謨不致遺失即以和禮霍孫獨胡刺克翰林侍

制兼起居注詳見給事中門

英宗至治二年十一月御史言朝廷雖設起居注所錄皆臣下聞奏事目上之言動宜悉書以付史館從之

皇明

國初甲辰年設起居注乙巳年設太史監後俱裁革而史職悉屬翰林院

拾遺補闕

遼南面門下省左諫院有左補闕左拾遺二員中書省右諫院有右補闕右拾遺二員

金諫院有左補闕右補闕左拾遺右拾遺皆正七品

元世祖至元六年始置左右補闕十五年改為侍儀奉御

兼修起居注詳見給事中門

皇明俱屬臺省不設

典儀

遼北面敵烈麻都司掌禮儀其官有敵烈麻都有總知朝廷禮儀有總禮儀事已為禮部之職南面自禮部外

不設典儀

金無

元世祖至元八年勅元正聖節朝會凡百官表章外國進獻使臣陛見朝辭禮儀皆隸典儀司

皇明典儀俱屬鴻臚寺惟外國使臣譯字官生則別設四

夷館翻譯文字凡以達夷情重 國體也自永樂五年
因四夷朝貢言語文字不通特設八館爲鞮鞞爲女直
爲西番爲西天爲回回爲百夷爲高昌爲緬甸及正德
七年八百夷人蘭者哥進貢又增八百館凡九先是選
國子監生習譯宣德元年兼選官民子弟委官爲教師
命翰林院學士稽考課程至正統九年又 諭寺副
姚本主事于禮提督至弘治七年 內閣大臣懼法久
人玩無以稱 上旨又請建置太常寺卿少卿各一員
爲提督蓋視昔益加嚴矣

城門卽

遼無考

金京城門有收支器物使 貞祐元年置每城一面設一
員五年南京隨門添設舊有小都監後省正八品十四
員戶部辟舉凡十有四門曰開陽曰宣仁曰安利曰平
化曰通遠曰宜照曰利川曰崇德曰迎秋曰廣澤曰順
義曰迎朔曰順常曰廣智各門尉副尉從七品副正九
品

元大都城門尉秩正六品尉二員副尉二員掌門禁啓閉
管鑰之事二十四年復以六衛親軍叅掌凡十有一門
曰麗正曰文明曰順承曰平則曰和義曰肅清曰安貞
曰建德曰光熙曰崇仁曰齊化每門設官如上隸大都
留守

皇明不設前職京城各門置守門千戶所

符寶郎

遼南面符寶司屬門下省其官有符寶郎重熙初耶律玦為之

金設符寶郎四員掌御寶及金銀等牌屬殿前都點檢司

舊名牌郎祗候大定二年改為符寶郎
候改牌郎令史為符寶典書四人

元世祖至元初立符寶局後改典瑞監 大德十一年改

監為院秩正二品掌寶璽金銀符牌置院使四員同知

員正平閣庫一員所屬小吏有差因中書省臣言舊制

及金銀符典瑞院掌之給則由中書事已則復

歸典瑞院今出入多不由中書下至商人結托近侍奏

請以至汎濫出而無歸請自後除官及奉使應給者非

由中書勿給遂為制

皇明尚寶司即國初符璽郎也正七品後置尚寶司正三

品洪武元年改正五品

本司卿一人少卿一人司丞三人恩蔭寄祿無常員監

生六人

卿職在禁廷守 寶璽符牌印章而辨其所用有事請

於內既事奉而藏之少卿司丞為之貳凡寶十四曰

奉天之寶以鎮萬國祀 天地曰 皇帝之寶以 冊

封賜勞曰 皇帝信寶以徵召軍旅曰 天子之寶以

祭享鬼神曰 天子行寶以封賜夷蠻曰 天子信寶
以調發番兵曰 制誥之寶以識 誥命曰 勅命之
寶以識 勅命曰 廣運之寶以識 黃選勘籍曰 御前
之寶以進 御座從車駕曰 皇帝尊親之寶 答 賜
宗人曰 敬天勤民之寶以訓迪有司 凡用 寶捧
寶 從 寶洗 寶與印綬監俱 凡扈守侍衛命牌之
號六曰 申曰 木火土金水以警夜巡 金牌之號五曰 仁
曰 義曰 禮曰 智曰 信以嚴守衛 凡半字銅符之號四曰
承曰 東曰 西曰 北 巡者左半守者右半合契而從事焉
凡銅牌之號一曰 勇以稽守卒 凡牙牌之號五曰 勳曰
親曰 文曰 武曰 樂以察朝恭 凡祭牌之號三曰 陪曰 供

善以潔祀壇 凡符驗之號五曰 馬曰 水曰 達曰 通曰 信
以給傳御通 制命

通事舍人

遼南面通事舍人院屬門下省官置通事舍人

金閣門通事舍人屬宣徽院官二員從七品掌通班贊唱

承奏勞問之事

元宗設以其事歸典儀

皇明設翰林院提督四夷館內有各國通事少卿一員主
之詳見土貢下

弘文館

遼不設

金改弘文館為弘文院知院從五品同知弘文院事從六

品校理正八品掌校譯經史

元文宗天曆二年置藝文監所掌與弘文館同領于翰林

院官秩詳本監

集賢院

遼無

金貞祐五年設知集賢院從四品正大元年授馬璘同知

集賢院從五品同議官正八品諮議官正九品供不限

元集賢院秩從五品掌提調學校徵求隱逸召集賢良凡

國子監玄門道教陰陽祭祀占卜祭道之事悉隸焉初

置集賢院至元二十年併入翰林同一官署二十二

年分置兩院皇慶後定置集賢院大學士五員從一品

學士二員正二品侍讀學士二員侍講學士二員並從

二品直學士二員從三品經歷一員從五品都事二員

從七品侍制一員正五品修撰一員從六品兼管勾承

發架閣庫一員正八品所屬三

興文署秩從六品署令一員以翰林修撰兼之署丞一

員以翰林應奉兼之至治二年罷置典簿一員從七

品掌提調諸生飲膳與凡文牘簿書之事仍置典史一

皇明

皇明太祖高皇帝... 皇明太祖高皇帝... 皇明太祖高皇帝...

二百四十二

續文獻通考 卷之八十六
太祖吳元年五月己亥初置禮賢館尋設翰林院學士正
三品侍講讀學士正四品直學士正五品修撰典簿正
七品編修正八品洪武二年正月戊申定學士承旨
正三品學士從三品侍講學士正四品侍讀學士從四
品直學士正五品典簿正七品待制從五品修撰正六
品應奉正七品編修正八品典籍從八品三年置弘
文館學士九年罷閏九月癸巳詔定百官品級承旨
與六部尚書俱正三品班在其上學士從三品侍讀學
士正四品侍講學士從四品二十三年八月己卯增設
檢校從九品十四年五月癸未革承旨直學士改翰
林院五品衙門設學士一人侍講學士二人侍讀學

士一人孔目一人屬官侍講二人侍讀二人待詔二人
史官修撰三人編修四人檢討四人革承旨直學士待
制應奉檢閱典簿十五年做宋殿閣大學士之制設
華蓋武英文淵文華東閣諸大學士然官不過五品職
不過備顧問而已十八年三月丁丑命吏部定正
翰林院官學士一人正五品侍讀學士侍講學士各二
人從五品首領官孔目一人未入流屬官侍讀侍講各
二人正六品五經博士五人正八品典籍二人從八品
侍書二人正九品待詔六人從九品又史官修撰三人
從六品編修四人正七品檢討四人從七品俱屬本院
簡用取聖裁官無定員而侍讀先侍講則始於此

建文年間更易官制仍設翰林院正官學士承旨一員
在學士之上改侍讀學士侍講學士俱爲文學博士設
文史二館文翰館以居侍讀侍講侍書五經博士典籍
待詔其侍書陞正七品文史館以居脩撰編修檢閱改
孔目爲典籍創置典簿廳而革中書舍人改爲侍書以
隸翰林又增設文淵閣待詔及拾遺補闕等官 永樂
初皆復洪武十八年舊制又增建于東閣角門內以編
修解縉等七人入 內閣恭預機務典綸綽謂之閣臣
然本院印信自王景去後猶以 內閣學士解縉胡廣
楊榮等相繼署院 洪熙以後添設謹身殿大學士而
楊士奇等加至師保於是禮絕百僚隱然有鈞衡之重
不復署掌院事矣然文淵閣本 內署非衙門名故凡

朝廷之召宣諸司之文移雖事關機務亦止稱翰林
初不以 內閣名及 正統七年本院落成掌院事學
士錢習禮不設西楊南楊公座曰此非三公府也至期
二楊以聞乃 命工部具椅案禮部尚書胡濙定位次
以楊所職固翰林也而近來文移動稱會同 內閣大
臣豈其未聞前 制矣乎第文淵 內署諸曹異文移
往復猶以翰林行之今雖稍稍變革而猶有一二存者
如史成焚草中貴傳 旨猶傳大學士爲翰林學士翰
林公署中左設大學士三座學士一座而講讀學士東
西對列是學士秩雖卑而職與 內閣相表裏 本院

自 永樂十九年定鼎北京遂設衙門於此以留都爲
南京翰林院止設學士一員掌之遇有員缺從 內閣
推舉其後侍講以上官皆得掌院事仍設孔目一人
國初稱庶吉士者初稱中書六科庶吉士十八年又有
翰林院承勅監庶吉士未樂二年始定爲翰林庶吉士
選進士教養之無定員試而留者二甲爲編修三甲檢
討不得留者爲給事中御史主事或出爲州縣官
本院學士一人侍讀學士二人侍講學士二人其屬官
侍讀二人侍講二人五經博士五人典籍二人侍書二
人待詔六人孔目一人史官修撰三人編修四人檢討
四人史四人

學士掌詞翰文章 誥勅備顧問詳正圖書考議制度
凡 經筵日講修書之事皆承受而統領焉講讀職專
講讀經史五經博士專經講義以佐學士講讀典籍勾
輯圖書以時什襲而歲之侍書以字書侍上待詔應對
孔目典文移出入史官掌修 國史凡天文地理 宗
潢禮樂兵刑諸大政 上所下 詔勅書檄批荅 王
言皆謹籍而記之以備實錄凡學士講讀史官爲 上
所簡注皆得入 內閣預機務京府鄉試充考試官禮
部會試充考試同考試官詹事府坊局亦如之

英宗天順中大學士李賢建議請專選進士科充翰林院
官遂爲 制先是景泰間陳循輩私其所舉以雜流冒

銓一時翰苑多委靡昏鈍浮薄之流吏部不敢別調至是有旨重修大明一統志制曰惟擇進士出身者爲之於是諸輩多乞改職李賢因言于上命吏部別除之翰林爲之一清且請著爲制從之自後非進士起家不得居翰林爲孤寒非翰苑出身不得入內閣居宥密雙溪雜記云自來陞用六部堂官不拘出身何衙門如天順間以布政蕭暉爲禮部尚書無禮部必用翰林出身之例又如楊士奇以儒士由齊府審理副胡儼由知縣又李賢由吏部主事薛瑄御史皆得入閣亦無內閣必用翰林出身之拘成化弘治以來南北吏部每部必選用翰林一人南北禮部非翰林出身者不得陞入

史官

宋

寧宗嘉定二年秘書郎真德秀奏請命國史實錄院所修事節朝廷看詳允當即頒下玉牒會要所奉照重行修纂其畧曰恭惟陛下賢聖仁孝自昔著聞甲寅之秋肇履大位蓋出於先皇付托之誠憲聖擁佑之力而大臣實奉行之授受之間燦然明白秉史筆者固宜鋪張其美以詔萬世而臣伏觀玉牒會要所書太抵承迎佞胃之意而誇大其功過畧個人莫此爲甚昔紹聖中奸臣用事被宣仁以奪嫡之謗加蔡確以定策之功顛倒是

非終危宗社今陛下躬膺祖宗神器之重而簡冊所記顧歸一擯相之小臣傳之萬世何以爲法况且受恩之人豈無報復之念倘不亟加辯正異時或得籍口以逞其私紹聖崇寧之禍可鑒也臣側聞嘉定元年二月議臣有請命史官取紹聖五年以後至開禧三年以前史院文字并日曆時政記凡涉誣罔悉行改正陛下旣俞之矣歷時寢久必已成書臣願特降睿旨命國史實錄院具所修事節上之朝廷看詳允當即頒下玉牒會要所參照重行修纂上以光聖朝揖遜之美下以杜奸黨窺覷之漸天下幸甚

十五年司封郎中魏了翁論實錄闕文其畧曰臣曩者

濫員東觀蓋嘗伏讀金匱玉板之藏每惟祖宗實錄自東都以前凡一百六十八年不過一千餘卷而南渡以後高宗孝宗皇帝兩朝實錄僅六十餘年遂至一千卷以三十六年事爲五百卷猶之可也而二十七年爲卷亦如之意其廣記備言無所脫遺而臣偶因當時所遭隨事檢閱則有不盡然往往一月而釐爲二三卷往往州縣細故亦動千餘言至事關大體顧及脫畧且如開禧元年虜使趙之傑要陛下起受國書臣時以館職獲陪朝署之後偶記乾道六年虞允文爲相虜使烏林荅天錫倨慢與此相似時則允文前奏大駕還內放仗罷朝臣與在列誦言其事所冀速達有頃聞陛下徑還禁

中一如乾道故事臣謂宰執必有接此以開陳者乃聞韓侂胄爲宰執言此謝廓然爲之不知廓然秉政尚後此十餘年也臣旣還朝即取乾道國史實錄會要聖朝日曆諸編徧加披閱則於此事或全無所載或畧及一二而實錄則仍循常比書垂拱殿賜茶酒不知是日茶酒未嘗設也又書知閣事王抃上疏詔明日引使人朝見乃似專美於抃而抃詞止議受書之儀亦不及放仗罷朝事此實錄之闕文有如此者是歲蘇師旦除安遠軍節度使明年六月師旦抵罪詞臣以章制罷去或謂內制未有封駁故事臣因記乾道七年三月己卯張說除參樞張栻等言其不可旋即反汗八年二月乙卯申

命則周必大以直學士院繳還批詔且乞以宣徽命說臣即檢閱實錄諸書則已外事無所載止於是月戊子書節度使萬壽觀制不書事始已當脩正至八年乙卯事則又逸去矣夫主聖則臣直此最是先朝美事而前後皆不書此又見實錄之缺文有如此者開禧二年三月倪思與李壁爭論明堂嚴父配天事朝論莫知所決臣因記淳熙三年三月丙午朔秘書監李燾奏乞舉行宗祀明堂之禮歷引神宗皇帝聖語及錢公輔司馬卬李受諸儒之說嘗下群臣議雖不果行然實錄不當全脫其事至淳熙六年趙雄爲相竟白行之實錄亦所不書元降明堂詔書亦未嘗登載而閱樂等事亦擱失實

又見實錄之闕文有如此者臣因是三事每嘆孝宗皇帝明謨偉斷卓乎前代者不可勝記而臣偶記所聞輒逢脫畧夫卷帙猥煩若此而記載脫畧乃爾若不及今距乾淳未遠文字未盡淪失老師宿儒故家遺裔尚可訪問亟與搜羅會粹否則因循浸久必致是非失實無以傳示將來臣伏覩實錄院見遵詔旨改修孝宗光宗兩朝實錄增入列傳臣愚欲望睿旨併下本院令史官將兩朝實錄重加點檢儻有缺失如上所陳者即採訪增入其冗濫重複及史文不經去處悉與刪削庶幾文省而事詳足以垂憲貽後仰副陛下寅念列祖之意理宗淳祐二年秘書少監蕪修起居注官高斯得進修史

故事其畧曰臣嘗伏讀國史竊見祖宗修書故事帝紀志傳必一書成乃修一書未嘗有並修兩書者蓋國家大典關係至重非專心致志爲之則不能紀載得實傳信後世且以神哲微欽四朝正史言之乾道中史官李燾上帝紀旣而補外及再還朝乃命修列傳故燾初至有此三項奏請列傳垂成而燾卒所謂展限來年春季者竟不果就遂召洪邁卒成之十三年十一月乃克登進曰紀曰志曰傳次第而修首尾二十七年四朝大典始孝宗皇帝豈不欲其速具哉而責成有漸如此以燾良史之才無出其右亦不敢自詭並修志傳而二書之進先後相距其遠又如此以是言之崇成巨典其可以

易言哉臣伏見國史院被旨修纂高孝光寧四朝志傳限來年三月登進臣叨與載筆苟有管見不敢默已且詔修四朝志傳爲日久矣趙以夫始專其事不知亟加纂輯乃欲先合九朝正史爲一而後以四朝續之用力舛差遂墮汗漫迄以夫之去四朝志傳竟無一字沈騰繼之當其任矣而乃引嫌力辭尤靖又繼之亦復控避又乃就職更三史官虛曠歲月幾及兩載實爲可惜九月以來乃方分命僚屬然規模不立人情渙散既不照舊例奏請先立年限又不考故事分志傳爲兩次以百餘年間歷史官二百八十餘人所不能成之書自詭速成於數月之內抑何其輕易乎夫神哲微欽諸臣列傳

至熹之時已經四修三修兩修一修可謂易於成書矣猶且踰四年而後奏進今高孝光寧諸臣當立傳者人數猶未能定雜揉踈漏絕無倫次院史所供初草大抵徒具私家所供誌狀全未經史官考校增入他書又安得有所謂四脩三脩兩脩一脩者乃欲取辦於四五月之間臣知其苟且成裂務應期限希恩賞而不足傳信決矣雖然列傳粗有張本者也乃若諸志則從前未有片紙纂次今始創爲其間天文地理選舉禮樂之屬猶可編類綴緝惟兵財二者乃百餘年建國之實政本末闕闕功力浩瀚非可鑿空爲之者豈數月之所能辦乎且史院官例多兼職往往一時煩劇之任叢於厥身有

如壽所謂精力有限詳彼畧此者而望其專力總領速
成大典難矣臣非倡為異論苟欲遷延以逃厥曠蓋考
諸故實昭然不誣乃敢援據以為陛下告欲望聖慈宣
諭提舉官及此編摩未定之初檢照孝宗皇帝修書故
事改命史院官專一編纂四朝正史諸志俟奏篇畢續
行纂次列傳庶幾脩書次第既合舊典又使諸史官不
分成篇可準不至苟且滅裂貽笑後世

遼

南面有國史院其設官曰監修國史曰史館學士曰脩撰
曰修國史

太宗會同四年詔有司編始祖奇首可汗事迹

是年寶寧八年諭史館學士皇后言亦稱朕暨予著為
式

聖宗統和八年北府宰相室旺進所撰實錄二十卷 十
九年正月詔曰歷官毋書細事 二十九年詔已奏事

附日曆

興宗重熙中耶律谷欲奏詔與林牙耶律庶成蕭韓家奴
編遼國上世事蹟及諸帝實錄

韓家奴見帝獵未嘗不諫會有司奏獵秋山熊虎傷死
數十人韓家奴書于冊帝見命去之韓家奴既出復書
他日帝見之曰史筆當如是

道宗太康初史臣進七帝實錄 清寧二年六月詔罷史

續文獻通考

二百四十三

二百四十二

官與聞朝議俾聞宰相乃書 五年五月監修國史耶律白請編次御制詩賦仍命自序先耶律孟簡請闕上疏曰本朝之興幾二百年宜有國史以垂後世乃編耶律昌魯屋質休哥三人行事以進上命置局編修孟簡謂餘官曰史筆天下之大信一言當否百世從之苟無明識好惡徇情則天禍不測可不慎哉 時上欲觀起居注修注即不擲突忽重不進各杖二百罷之 壽隆二年太子洗馬劉輝上疏曰宋歐陽修編五代史附我朝于四夷妄加貶訾且宋人賴我朝寬大許通和好得盡兄弟之禮今及令臣下妄意作史恬不經意臣請以趙氏初起事蹟詳附國史上嘉其言 天祚初命纂實

金

金

初國史院嘗以諫官兼職明昌元年詔諫官不得兼恐于奏章私溢已美故也其官曰監脩國史曰脩國史皆一員曰同修國史二員女直漢人各一員曰編修官正八品八員女直漢人各四人檢閱官從九品十員女直漢人各五員脩遼史刊脩官一員編修官三員太和四年增設國史院女直漢人同修史各一人

世宗大定十二年十一月上屏侍臣與宰臣議事記注官亦退上曰史官記人君善惡朕之言動及與卿等所議皆當與知其於記錄無或有隱可以朕意諭之 十八

續文獻通考 卷之八十一 三十五 三百五十六 三百五十七

年正月修起居注移刺傑上書言每屏人議事雖史官亦不得與聞無由紀錄上以問平章政事石琚左丞唐括安禮對曰古者置史官于左右言動必書所以儆戒人君庶幾有所畏也

章宗太和六年二月尚書省奏右補闕楊廷秀言乞令官編次日曆封送史院上令付著作局潤色付之

元

元以翰林兼國史其官秩詳具學士院順帝時常以右丞相統之

仁宗皇慶元年上謂省臣曰翰林集賢儒臣須朕自選用毋輒擬奏人言御史臺任重朕謂國史院其任尤重蓋御史臺是一時公論國史院是萬世公論於是陞翰林

國史院爲從一品

胡粹中曰元諸君雖不習爲文字之學其所稟風氣完固天質淳厚故發言往往暗合理道如仁宗常言人言御史臺重任朕謂國史院任尤重御史臺是一時公論國史院是萬世公論至哉言乎雖知道之君不是過也雖然持萬世之公論者苟不詢一時之公論則其所立言必非公論矣

英宗至治三年國史院進仁宗實錄先一日拜住詣國史院聽讀首卷書大德十一年事不書左丞相哈剌哈孫定策功惟書越王禿剌勇決從容謂史官曰無左丞相

雖百越王何益書鷹犬微勞而畧發縱指示之人可乎立命書之他筆削未盡者悉令補正人服其識

文宗至順二年正月御制奎章閣記上嘗至閣中命取國史閱之左右昇匱以往院長貳無敢言者編修官呂思誠獨跪奏曰國史記當代人事善惡自古無天子取觀之理遂止

胡粹中曰古人有言守道不如守官呂思誠抗言執奏可謂能守官矣文宗聞諫而止不亦允賢乎哉

順帝至正三年詔修遼金宋三史以右丞相脫脫爲都總裁平章鉄木兒塔識右丞賀惟一中丞張起巖翰林學士歐陽玄侍御史呂思誠翰林侍講學士揭傒斯爲總

裁官丞相問修史以何爲本揭傒斯曰用人爲本有文學而不知史事者不可與有文學知史事而心術不正者不可與用人之道又當以心術爲本傒斯又言作史之法須求作史之意政事得失人材賢否一律以是非之公至於物論不齊必反覆辯論求歸於至當而後可五年十月遼金宋三史成右丞阿魯圖進呈上曰史旣成書前代善者足法惡者取戒豈止爲君者人臣亦當知之卿等其體朕心以前代善惡交相戒勉

皇明

本朝史官即翰苑諸臣之職

按前代修史左史紀言右史記動宮中有起居注如晉

董狐齊南史皆以死守職司馬遷班固皆世史官故通
知典故親見在廷君臣言動而書之後世讀之如親見
當時之事 皇明初設起居注尋設翰林編檢等官皆
文史官立班雖近螭頭亦遠在殿下成化以來 君不
復與臣下接 朝事亦無可紀凡修史則取諸司前後
奏牘分爲吏戶禮兵刑工爲十館事繁者爲二館分派
諸人以年月編次雜錄成之副總裁刪削之 內閣大
臣總裁潤色之其三品以上乃得立傳亦多紀出身官
階遷擢間有褒貶亦未必盡公

今上萬曆二十二年三月大學士王錫爵等請 勅儒臣

開書局纂修 本朝正史以垂萬世看得正史之纂修

雖稱創議粵稽先代咸有舊章如漢史成于班馬二公
宋史評于真仁二宗凡皆以本朝之史紀本朝之事故
聞見真而傳信遠也 明興二百餘年治化綦隆遠超
千古正史未備後嗣何觀切惟 制書凡載之大者無
若 累朝實錄 大明會典二書顧實錄取編年而事
蹟不相聯貫會典止載條例而議論未及詳收各有體
裁初非史法即欲考一事之顛末求一人之始終浩瀚
難周搜尋不易方今家乘野記勦塗說而傳訛名德嘉
猷散遺文而勿顯誠爲闕典據所請前項正史一節委
宜及時纂修以垂不朽之傳以彰 勅諭以重其事况
茲正史之纂尤爲創起之規必須裁自 聖心特頒

明訓 議得先年纂修其總裁用閣臣文之副總裁用翰林等官謄錄正稿用史館中書等官抄寫草稿收藏掌管吏部選取吏員充役今史冊浩繁編摩難竟設官宜備求才宜廣查得翰林各官給假在家假滿未來者尚多宜令吏部行人催取赴京至于海內博學洽聞之士或官別署或淹外僚容臣等咨訪文行兼優者不論品流員數量改京銜入館供事或有閒住官員山林隱逸行義無虧文學可取者還令吏部訪薦一體錄用庶吏才畢集而編摩不患乏人矣 又議正史傳信聞見宜博書籍不備考究何資 本朝制書元與史法相關見貯 內閣者暫令各館取看其志記紀事等書有欲

修考而無從措處者待開館設官後容令備細開具款目其 制書行 內府衙門印刷領給此外一切諸書宜行禮部都察院移文兩京各衙門及各巡按御史提學官多方購求解進以備查考采擇 又議事有專任則用心不分人有分授則勤惰易考令依原奏所定先修大志大紀年表次之列傳又次之分類別款各授一事庶條理不紊而功叙可稽 又議史以精核為主固不貴速成然非立程限難責成功合無將各官分授編纂者視其繁簡限以月日各送總裁刪定如志紀表傳之類依限驗完逐件繕寫再照自古編輯大書常經一人之手庶精神聯屬首尾貫串今宜專屬副總裁畢

力爲之允纂修等官毋得轉易討差給假即有遷轉亦必將原派纂修條欵候撰完交送方行庶專供職業早成鉅典可免頭白汗青之譏 上是之 二十三年九月禮部覆 累朝闕典究竟難湮看得給事中楊天民御史牛應元各稱建文年號向奉革除 累代因循未經議覆先是 太祖高皇帝在位 懿文太子薨逝即立 太孫至 洪武三十一年 太孫嗣位改元建文御宇凡有四載 暨 成祖文皇帝以靖難登極遂削去其年號而 高廟實錄於是有三十五年之稱夫太祖在位實惟三十一年而三十二年以後安得尚蒙 洪武之號 建文旣已負宸臨朝薄海內外奉有正

朔矣一旦削而除之無乃非所以示信于天下乎方今 聖明善繼善述表揚 祖功 宗德以彰大孝臣等亦不敢以妄生意見別議更張而 建文位號在當年無削去之文今亦無憑議復惟及此纂修之時 特命 秉史局者於 高廟實錄之中摘 洪武三十二年以逮三十五年遺事復叙 建文元年二年三年以存其年號仍修葺焉 少帝本紀示不泯沒而其間疵政過舉自不能曲爲隱諱 成祖靖難之烈固爲奕世而有光而 建文在位之績亦同殷監而不爽慰幽魂於九原昭大義於天下微顯闡幽信今傳後其裨益 國體而增光 聖德非眇小者奉 旨 建文事蹟着附載

